

Samentara Thaij Koen boetoe tempo telah sediaken medja perdjamoean boeat mendjamoe Swat Keng dengen iboenga doedoek makan - minoem. Sesoeda itoe, baroelah ini iboe dan anak diantar ka loteng Siauw Hoen Kok boeat mengaso.

Dalem kamar terdapat segala apa ada tersedia setjoekoepnja, begitoepoen di medja berias tiada ketinggalan dengen segala poepoer wangi, minjak ramboet dan Jan-tji.

„Ini loteng bekas ditinggalin siapa ?“ menanja Swat Keng pada iboenga, „keliatan segala apa ada tersedia begitoe tjoekoep.“

„Inilah ada mendjadi kamar tidoernja kaoepoenja Piauw Tji, Jan Giok,“ djawab Bwe Sie.

„Katanja Piauw Tji ada tinggal di roema diapoenga Gwa-ma dan masih belon poelang,“ berkata lagi Swat Keng.

Bwe Thaij-thaij poen lantas menoetoerken pribal Jan Giok kemaren malem soeda minggat dari roema bersama Kang Sam So, sebab ini ada satoe keboesoekan, makanja Thaïj Koen tadi tiada maoe bitjara teroes terang sama sang gadis.

„Tetapi,“ kemoedian Bwe Thaïj-thaij berkata lebi djaoe, „biarlah dalem ini hal kaoe tiada terlaloe banjak bitjara dan amat bisa

djadi Jan Giok ada bikin perhoeboengan resia dengen sala satoe djedjaka, maka itoe setelah mengetahoei jang dirinja hendak dipaksa menika, sigra djoega ia lari minggat."

"Ach, inilah ada satoe perkara moestail," berkata Swat Keng, „menginget Koe-boe seroema tangga ada teritoeng dalem golongan orang paling moelia dan djaja, samentara poetri jang pertama ada mendjadi permisoeri baginda keizer, masakah poetri kadoea maoe lakoeken ini perboeatan jang terkoetoek. Anak lebi pertjaja kaloe dalem ini kedjadian tentoenja ada terselip seroepa perboeatan sewenang-wenang, atawa boleh djadi bahoea Piauw Tji sedari ketjil soeda ditoenangken pada orang, tapi sebab ini wakoe djoestroe fihak jang lelaki lagi hadepin kemiskinan dan kemoelaratan, mendjadi Koe-boe berkeras serta mengambil kemaoean sendiri memoe-toesken itoe tali-perdjodoan, kemoedian hendak nikahken pada laen orang jang melanggar kesoetjian, kaloe bersama-sama Kango Sam So minggat ka laen tempat boeat menjingkirin diri, agar bisa membelah kehor-matan dirinja dengen baek, serta mengandeng pengharepan kaloe-kaloe iapoенja bekas toenangan bisa mendjadi poela orang jang terindah, pastilah itoe perdjodoan lan-

tas bisa dilangsoengken setjara sampoerna. Sedeng djika betoel Piauw Tji ada berboeat sebegimana ditoedoeh, pastilah sedari djaoe-djaoe hari dia soeda mlariken diri dan tiada perloe toenggoe sampe dateng deket tempo-nja hendak menika baroe pergi. Djoega apa goenanja moesti sekalian bawa Sam So ikoet minggat, ja, inilah tentoe moesti ada terselip laen sebab, jang kita tiada boleh lantas pertjaja bahoea Jan Giok Piauw Tji sesoeng-goenga ada satoe prempoean boesoek."

Mendenger ini peroendingan jang beralesan, Bwe Thaij-thaij keliatan seperti orang baroe tersedar dan berkata :

"Ja, kaoepoenja perbilangan ini poen bisa djadi ada bener, anak."

Tetapi sang iboe masih semboeniken pada anaknya prihal itoe soeal perwakilan boeat menika. Dengan begitoe kemoedian orang pada masoek tidoer.

Besok paginja, sesoeda beres berias dan sebaginja, ini iboe dan gadis laloe sama toe-roen ka bawah loteng aken doedoek dahar pagi bersama-sama Thaij Koen, atawa setelah makan kenjang, orang laloe doedoek berkoempoel di roeangan pertengahan blakang boeat saling beromong-omong. Tetapi belon berdjalan lama, tiba - tiba keliatan saorang

boedak prempoean soeda masoek merapport katanja:

„Tjoei Thaïj Hoedjin dengen membawa poetranja lagi dateng berkoendjoengan, ha-replah Thaïj Koen mendapat taoe.”

Thaïj Koen sigra prenta memboeka pintoe tengah boeat silahken tetamoenga masoek, sedeng Swat Keng boeroe-boeroe menjingkirin diri ka blakang. Dan tiada antara lama, djolinja Tjoei Hoedjin telah sampe di tengah pekarangan. Thaïj Koen lantas menjamboet Tjoei Hoedjin toeroen dari djolinja, serta bersama-sama dateng di pertengahan gedong, di mana Bwe Thaïj-thaïj ada menoenggoe, begitoeelah satoe sama laen laloë saling membri hormat.

„Inilah ada entjikoe, Tjoei Thaïj Hoedjin,” berkata Thaïj Koen pada Bwe Sie, „bersama poetránja kadoea, Pan Hong, jang telah beroleh gelaran Sioe Tjaij. Mendjadi kita poen masih teritoeng familie deket, biarlah Leng Aij dioendang keloeear boeat saling bertemoe.”

„Ja,” djawab Bwe Thaïj-thaïj, „akoe nanti aken panggil Swat Keng keloeear berdjoempa.”

Samentara itoe, Tjoei Pan Hong soeda moendoer sedikit ka blakang dan berdiri di satoe pinggir.

Bwe Hoedjin mengawasin dengen teliti orang poenja roman, maka ia dapetken se-soenggoenja Pan Hong ada teritoeng satoe djedjaka jang amat tjakep, dalem hatinja siang-siang soeda merasa amat boengah, sigra djoega kemoedian bersama Thaij Koen ia laloe berdjalanan masoek ka dalem.

Koetika telah bertemoe dengen Swat Keng, Thaij Koen lebi doeloe soeda membilang katanja:

„Entjikoe djoestroe telah dateng kemari dan kepingin aken bisa bertemoe moeka dengen Hian Seng-li.”

Maskipoen dalem hati tiada begitoe mengasih, toch Swat Keng kepaksa djoega ikoetin kedoea orang toeatoe dari blakang dan bersama-sama dateng ka itoe roeangan pertengahan blakang boeat djoempaken Tjoei Hoedjin. Tetapi koetika dapet liat Tjoei Pan Hong ada berdiri di satoe samping tiada djaoe dari sitoe, dengen tergopo-gopo Swat Keng agaknja keliatan seperti orang hendak lantas menjingkirin dirinja.

„Dia inilah ada akepoenja Gwa Seng, Tjoei Pan Hong,” Thaij Koen berkata dengan tjeplet seraja menjega niatannja si gadis, „dan djoega teritoeng orang dari satoe golongan familie, maka perloe apa moesti maoe

menjingkir."

Samentara itoe, iboenja Pan Hong telah memanggil sang poetra, seraja katanja : „Marilah, anakkoe, dateng berdjoempa kemari.”

Pan Hong poen sigra mendeketin, lebi doeloe ia membri hormat pada Bwe Thaij-thaij, baroe kemoedian ia membri hormat pada Swat Keng, jang itoe tempo aer moekanja telah beroba mera lantaran saking maloenja, tetapi apabolehboeat ia kepaksa djoega membales orang poenja hormat sepantesnya.

Koetika mana, ternjata Pan Hong soeda bisa memandeng orang poenja paras sepoeasnja, Thaij Koen baroelah maoe lepaskan tangannja dan Swat Keng dengan terboeroe-boeroe lari masoek ka dalem.

Kemoedian Tjoei Hoedjin laloe tarik Pan Hong toeroen sampe ka bawah halaman, serta tanja padanja :

„Beginama, anakkoe, kaoepoenja penda-petan ?”

„Ja, Boetjin,” saoet Pan Hong, „bolehlah didjadiken sadja ini perdjodoan.”

Thaij Koen jang setelah mendapat taoe ini penjaoetan, dalem hatinja boekan maen ampoenja girang, sembari berkata kemoedian:

„Kaloë Hian Tit soeda penoedjoe, biarlah selandjoetnja akoe harep tentang ini perwakilan menika tetep bisa dipegang resia, begitoepoen di depannja Boe-koe, djangan sekali dibilitjaraken hal ini, kerna lebi sedikit orang taoe, akoepoenja maloe ada harepan tiada sampe tersiar. Dan sebegimana soeda ditetepken, tanggal Dji-go ini perkawinan bisa lantas dilangsoengken.”

Pan Hong membenerken itoe perbilangan. Dalem begitoe, ternjata Bwe Sie lebi siang soeda masoek ka daem, doedoek berkoem-poel dengen poetrinja, sambil membitjaraken halnja Thaïj Koen hendak wadjibken ia mengantiken Jan Giok boeat menika pada Tjoei Pan Hong.

„Anakkoe,” achirnja sang iboe berkata lebi djaoe, „kitapoenja roema tangga sekarang soeda roesak semoeanja, sedeng Pan Hong poen ada toeroenan orang berpangkat, lagipoen dia mempoenjai kepinteran jang baek dan roman jang tjakep, maka itoe, akoe pikir inilah ada soeatoe perdjodoan jang paling baek dan satoe koetika jang soeker bisa didapetken poela, biarlah kaoe soeka lantas menoeroet.”

Swat Keng poen ternjata setoedjoe amat dengen itoe hal, maka sama sekali ia tiada

perna oendjoek kebratan ini-itee.

Sesoeda ini oeroesan tiada keliatan ada
rintanganja, Bwe Thaij-thaij laloe keloeear
kombali ka loear; samentara itoe Pan Hong
telah berpamitan dan berdjalan poelang lebi
doeloe.

Thaij Koen bersama Bwe Thaij-thaij dan
Tjoei Hoedjin masih tinggal doedoek ber-
koempoel di sitoe, aken memperbitjaraken
lebi djaoe soeal-soeal jang berhoeboeng de-
ngan pernikahan anak-anaknya. Achir-achir
iboenja Pan Hong telah minta dengen sanget
soepaja Swat Keng maoe keloeear poela ka
sitoe. Di mana, Tjoei Hoedjin keloearken
seboeah toesoek konde „Ngo Hoen Dji Ie
Tjam”, tantjepin sendiri di ramboet kapala-
nya Swat Keng, sembari membilang :

„Ini satoe barang jang tiada berarti, ada-
lah sebagi hadiaän bertemoe moeka, biarlah
Hian Tit-li djangan menampik poela.”

Dalem hatinja Swat Keng mengarti baek
maksoednja itoe pembrian, maka setelah
oetjapken trima kasi ia poen lantas masoek
poela ka dalem.

Sebentar lagi, bebrapa boedak prempoean
keliatan soeda atoer beres satoe medja per-
djamoean, ketiga njonja itoe lantas sama-
sama berdoedoek hadepin medja hidangan

terseboet. Swat Keng jang dioendang boeat doedoek makan bersama-sama, soeka tentoe tiada soeda toeroet biar begimana keras djoega moesti dipaksa.

Dengan penoe kegoembirahan, Thajj Koen, Tjoei Hoedjin dan Bwe Thajj-thajj, teroes makan dan minoem sampe lohor, baroelah boebar. Sedeng Tjoei Hoedjin soeda berpamitan poelang ka gedongnya sendiri, adalah Thajj Koen moelai mengatoer-atoer itoe berbagi - bagi barang perhiasan jang bekas dibawa oleh Beng Sie sewaktoe menika kemari dan ditamba lagi dengen beberapa matjem barang perhiasan laen, sediaken boeat dibawa kawin oleh Swat Keng.

Meliat ini semoea, Bwe Thajj-thajj mera-
sa amat bersoekoer dan tiada loepa hatoer-
ken trima kasinja pada Thajj Koen jang
soeda berlakoe begitoe soenggoe - soenggoe
hati boeat keperloean poetrinja.

Harian Dji-tjap-go, di sekiternya gedong Lauw Hoe telah dipadjang indah dengan berbagi-bagi kembang dan kaen - kaen mera, berikoet djoega segala tengloleng ; Ko Hong Gie sebagai djomblang soeda dateng memapak penganten prempoean, dengan sama sekali tiada taoe atas itoe perwakilan menika, hingga Thajj Koen jang meliat semoea

apa berdjalanan dengan rapi dan terresia, dalam hati merasa sepoeloe bagian ampoenja girang.

Itoe malem djoega pergaboengan antara Pan Hong dengan Swat Keng telah dilangsungken dan kenjataän ini sepasang penganten baroe bisa saling menjinta dan haderpin pengidoepan jang beroentoeng dan manis.

Tiga hari blakangan, kedoea soeami-istri ini menoeroet kebiasaan telah sama dateng ka gedong Lauw Hoe, di mana Thaij Koen trima orang poenja pembrian slamet dalem kwaliteit sebagai mama - mertoea, begitoe djoega Bwe Thaij - thaij. Soeda itoe, laloe diadaken satoe perdjamoean di mana orang doedoek makan-minoem dengan pengrasaän goembira dan bersoekatjita, sampe hari soeda djadi sore, baroelah ini kedoea soeami-istri berpamitan dan poelang ka gedong Tjoei Hoe.

Semandjek itoe, Bwe Thaij - thaij tinggal berdiam dalem gedong Lauw Hoe jang oleh Thaij Koen senantiasa diperlakoeken dengan manis dan hormat.

Adapoen Kang Tjin Hie jang memang soeda mengetahoei itoa ketoea dari gredja Ban Jan Am, Sian Leng, ada saorang mata-

doeitan, waktoe itoe sewaktoe Thaïj Koen repot mengawinin poetrinja atawa soeroe ia blandja barang ini-ite, ia tentoe sebrapa bisa goenaken itoe tempo boeat perolehken keoentoengan, jang dari mana kemoedian bisa djoega ia dapet koempoel sampe kira-kira sedjoemblah doea tael perak, dengen apa ia pikir aken antarken ka Ban Jan Am, boeat diserahkan pada Siotjia soepaja bisa dipake blandja.

Begitoelah pada hari kaämpat Tjin Hie soeda tjari kesempatan di waktoe senggang, boeroe-boeroe dateng di gredja Ban Jan Am. Apabila sampe dalem gredja ia dapetken Jan Giok ada bersama iboenja lagi doedoek mendjait.

Tjin Hie lebi doeloe membri hormat serta tanja kewarasannja sang Siotjia dan iboenja, baroe kemoedian ia menanja lebi djaoe:

„Tiada taoe begimana si Nie - Kho telah perlakoeken Siotjia selama berdiam di sini?”

„Ach, soedahlah,” berkata Sam So, „maskipoen itoe hari koetika baroe dateng kemari, Siotjia telah serahken oewang pada Sian Leng setjoekoepnja, tetapi setiap hari dia hanja menjegoeken doea kali hidangan jang meloeloe dari boeboer berikoet sedikit sajoeran dan thee jang paling djelek. Laen

dari itoe, Siotjia poen moesti bantoe dia boeat djaitin ini - itoe, berkerdja dari pagi sampe malem baroe brenti, en toch masih sering menjomel jang kitaorang soeda tiada berkerdja tjepet dan radjin. Och, ditilik dari sini, hari-hari ka blakangan pasti aken diliwatin terlebi soeker!"

„Ja, apa maoe dibilang, soeda nasib moesti hadepin peroentoengan begitoe," berkata Tjin Hie, „biarlah sabar sadja dan tjoba tahan seberapa bisa boeat samentara waktoe. Moedah - moedahan Thian tiada sia - siaken orang baek, Hong Hoe Kongtjoe bisa lekas menoeloeng ajahnja balik poelang ka negri sendiri. Beng Sie sekarang soeda tjegeerken diri dalem aer, hingga Siotjia pasti aken mendjadi istri jang pertama, kaloe soeda begitoe, kitaorang baroe hadepin peroentoengan jang seneng dan pengidoepan jang gilang-goemilang."

„Seande apa jang Tjin Hie oetjapken bisa kesampean," berkata Jan Giok, „akoe tentoe tiada loepa membales kaoeorang, iboe dan anak, ampoenja boedi besar. Aken tetapi sesoedanja akoe minggat, familie Tjoei tentoe tiada aken tinggal diam dalem itoe oeroesan perdjodoan?"

„Djoestroe sekali dalem ini hal orang

telah dapetken satoe kebetoelan," saoet Tjin Hie jang sembari menoetoerken prihal itoe familie Bwe soeda hadepken bintjana besar, serta tentang Bwe Swat Keng gantiken menika.

Mendenger ini perkataän, Kang Sam Sojadi berkata dengen soeara mengrendeng :

„Ach, satoe peroentoengan jang bagoes, dengen tjara begitoe moedah soeda diserahkan pada Bwe Ke, iboe dan poetri, boeat dikangkangin, sebaliknya Siotjia di sini moesti menangoeng berbagi - bagi kesengsaraän. Terlaloe !”

„Sebaliknya, inilah ada satoe kemoedjoeran,” berkata Jan Giok dengen girang, „soeda ada Bwe Ke Piauw - moaij jang ganti menika, mendjadi Boetjin poen etraoesa terlaloe ri-boet, soenggoe beroentoeng sekali !”

XXXIII.

Keilangan barang perhiasan, gadis setia
menanggoeng sengsara. Mengobatin
Thaij Houw, mantri pande
mengoendjoek kebisaän.

Kemoedian Tjin Hie laloe keloearken itoe
oewang doea tael lebi, serahken pada Sio-
tjianja boeat dipake blandja, serta berpami-
tan poelang dan berdjandji apabila di roema
ada kedjadian hal-hal jang penting ia tentoe
dateng mewartaken poela.

Jan Giok membenerken perbilangannja
sang boedak jang baek itoe, sedeng Tjin
Hie poen sigra berlaloe kombali dari gredja
terseboet. Tiada lama, Sian Leng keliatan
mendatengin ka sitoe.

Tetekala Sian Leng soeda dateng dalem
kamar bertemoe dengen Jan Giok, ia lantas
berkata :

„Hareplah Siotjia soeka dateng dalem
kamarkoe boeat goentingin pakean.”

„Kaloe maoe goenting pakean,” berkata
Jan Giok, „bawa sadja kemari soepaja akoe
boleh goentingin di sini.”

„Oleh kerna sama sekali ada tiga stel
pakean jang hendak digoenting, mendjadi
bakal makan djoega tempo sedikit banjak,

lagipoen sesoeda digoenting bisa lantas dibikin rangkepan di tempatkoe, agar tiada membikin potongan - potongan ketjil sampe djadi koetjar-katjir."

„Ja, begitoe djoega baek,” achirnja djawab Jan Giok, kemoedian lantas bersama Kang Sam So koentji pintoe kamarnja sendiri, ikoet Sian Leng dateng ka loear, di mana dengen ati-ati ia laloe moelai goentingin pakean-pakean itoe sebegimana dikehendaki oleh jang poenja, teroes kemoedian didjaitin dengan benang boeat djadiken itoe rangkepan.

Samentara itoe, laen-laen padri prempoean poen rata-rata pada melakoeken perkerdja-annja masing-masing, hingga di bagian blakang gredja itoe waktoe tiada kedapetan ada satoe orang djoega.

Terseboet dalem gredja Ban Jan Am, selain dari itoe padri - padri prempoean ada berkerdja djoega saorang lelaki toea sebagai pembantoe dan membikin bersi gredja, jang biasa diseboet Hio - kong. Siapa ada bernama Tjan Tjhit, soeda beroesia anempoeloe taon dan ada mempoenjai saorang anak lelaki, bernama Tjan Lee, berkerdja djadi toekang Tauw - hoe boeat pengidoepannja. Tetapi Tjan Lee lebi soeka berdjoeedi dari pada mengeroes perkerdjaännja dengan be-

toel.

Sedari lima taon berselang, Tjan Tjhit soeda dateng tinggal di ini gredja sebagi Hio-kong, tapi sebab semoea padri-padri antero hidoe moelarat dan dalem kemiskinan, hingga di sitoe poen tiada perna terjadi apa-apa malah semoea apa berdjalan dengen sentosa. Tiada kira, itoe malem koetika Jan Giok pertama-tama dateng berdiam dalem gredja, Tjan Tjhit setaoe dengan sengadja ada berada di loear djendela dan soeda bisa dapet liat antero isinja itoe doos jang dibawa oleh Siotjia kita, jalah barang-barang perhiasan jang berharga di antara tiga dan ampatra toes tael perak, sigra djoega dalem hatinja timboel soeatoe niatan djahat. Ia lantas tjari sampe dapet seboeah anak-koentji jang sama dengan koentji pintoe kamarnja Jan Giok. Lebi djaoe ia poen soeda perhatiken dengan betoel, bahoea koentji dari doos terseboet, Kang Sam So selaloe simpen di bawah bantelnja. Begitoe-lah Tjan Tjhit djadi senantiasa djaga tempo jang baek aken sigra kerdjaken maksoednja.

Itoe hari, koetika mengetahoei Siotjia dengan Sam So boeat waktoe jang lama djoega berada dalem kamarnja Sian Leng, sedeng laen-laen padri poen antero berada di loear

repot mengoeroes perkerdjaän masing-masing. Diam-diam ia lantas dateng ka kamar bla-kang, boeka pintoe kamarnja Siotja dengen goenaken itoe anak - koentji jang soeda di-sedia dari sekean waktoe dan masoek ka dalem. Ia dapetken itoe doos ada terletak di atas pembaringannja Sam So, maka ia tjepeet tjari sang koentji di bawah bantel, bener djoega traoesa makan tempo lama itoe barang soeda lantas didapetken. Ia moelai boeka toetoepnja doos, toeang ante-ro isinja di satoe sapoetangan jang memang ia ada bawa, serta kemoedian boengkoes baek sapoetanganja dan masoekin dalem sakoe badjoenja sendiri.

Sesoeda itoe, ia toetoep poela doos ter-seboet dan letakin tempatnja tadi, sedeng koentjinja kombali ia taro betoel di bawah bantel, lantas berdjalan keloeär dan koentji poela pintoe kamar sebegimana adanja.

Kemoedian Tjan Tjhit laloe bawa itoe semoea barang - barang perhiasan poelang ka roemanja, kasiken pada iapoenja anak, Tjan Lee, sembari memesen aken ia djoear itoe semoea boeat didjadiken pokok berda-gang dan djangan lagi soeka berdjoedi. Se-soeda itoe, ia sendiri boeroe-boeroe balik poelang dalem gredja dan belaga tidoer di

pembaringannja.

Samentara itoe, Lauw Siotjia dan Kang Sam So jang berkerdja di kamarnja Sian Leng, sampe waktoe soeda djadi lohor, beroelah bisa balik kombali dalem kamarnja sendiri. Tatkala Sam So hendak pindaken itoe doos ka atas medja, rasaken peganganja ada begitoe enteng loear biasa, dengen soeara terprandjat ia membilang pada sang Siotjia :

„Ach, Siotjia, ini doos rasanja soeda kosong, tentoe sekali semoea barang soeda tertjoeri oleh maling jang tiada ketahoean!”

Jan Giok belon maoe pertjaja, malahan telah berkata :

„Pintoe kamar dan toetoepnja doos, semoea terkoentji baek, tentoenja semoea barang perhiasan masih ada di dalem, moetstail amat bisa mendadak ilang?”

Kang Sam So lantas gojangin satoe kali itoe doos di moekanja Jan Giok, sembari berkata poela :

„Denger, Siotjia, di dalem toch tiada ada soearanja sama sekali, satoe tanda barangnya betoel-betoel soeda linjap!”

Aer-moekanja Jan Giok djadi poetjet dan berkata dengen soeara bergenometeran :

„Ja, inilah heran sekali!”

Ia lantas ambil itoe anak - koentji dari bawah bantel, boeka toetoepnja doos dan preksa isinja, bener, semoea kosong, tiada sepotong barang jang ketinggalan. Bahna goegoep tertjampoer panasaran, Kang Sam So djadi mendjerit dengen soeara keras, katanya :

„Pentjoeri! Manoesia kedjem! Barang perhiasan seharga anem - toedjoeratoes tael perak, antero digondol pergi. Och, akoe bisa djadi mati lantaran mendongkol !“

Mendenger ini soeara - soeara riboet, semoea padri - padri prempoean pada dateng berkroemoen di sitoe dan tanja sebabnja ? Jan Giok poen lantas oendjoekin itoe doos kosong pada sekalian padri sembari kata :

„Selagi kitaorang pergi goentingin badjoe di loear, setaoe siapa telah masoek dalem ini kamar, tjoeri bawa pergi seantero barang-barang perhiasankoe jang disimpen dalem ini doos, sedeng kemoedian soeda koentji poela toetoep doos dan pintoe kamar dengen betoei.“

Sam So masih sadja teroes mendjerit-djerit dan berkaok - kaok setinggi langit.

„Inilah terang sekali ada perboeatannja maling di dalem,“ Sam So sesambat lebi djaoe, „maka bisa mengetahoei sampe baek

bahoea itoe koentji ketjil ada terletak di bawah bantel, serta bisa lakoeken perker-djaännja begitoe leloeasa."

"Di sini, selamanja belon perna dimasoekin oleh orang loear," berkata sekalian padri dengen terheran-heran. „dan kitaorang poen belon perna satoe kali djoega taoe keilangan barang maoepoen oewang."

„Seande betoel ada maling jang soeda masoek dalem ini kamar," berkata Sian Leng setelah terpekoer sesaat lamanja, „moestail sekali jang dia soeda tiada ambil sekalian bersama doosnya, malahan ada begitoe baek hati meninggalin doosnya dengen terkoentji baek, begitoepoen pintoe kamar. Tidakah bisa djadi di itoe malem sebab kaeorang berlaloe dari roema dengen kesoesoe, soeda loepa membekel barang - barang perhiasan jang katanja sekarang ilang ditjoeri orang?"

„Loepa dibawa ? Hm !" berkata Sam So dengen tjebirken bibirnya. „Itoe malem tocis soeda diboeka di hadepannja orang banjak, satoe doos terisi penoe dengen barang-barang perhiasan jang tiada koerang dari harga toedjoeratoes tael perak ! Semoea mata telah saksiken betoel, begimana bisa dibilang tiada dibawa ? Ja, ja, njata sekali ini ada perboeatannja orang dalem, jang mengan-

doeng niatan sebagi satoe maling. Soenggoe kedjem dan terkoetoeklah dia!"

"Soeda!" berkata Sian Leng dengen roepa mendongkol, "akoe toch ini hari ada bersama-sama di loear, maka ini hal akoe poen tiada bisa tjampoer!"

Sehabisnya oetjapken ini perkataän, dengen oering-oeringan Sian Leng tinggalken itoe kamar dan berdjalan menoedjoe ka loear.

Semingkin pikir baken itoe keilangan, semingkin Jan Giok rasaken sedih dalem hatinya, achir-achir dengen tiada merasa aerma-tanja djadi djato mengalir di kedoea pipinja. Sedeng Sam So masih sadja memaki kalang-kaboet tiada brentinja sambil djoega menangis menggeroeng-geroeng mirip anak ketjil tiada dapet apa jang diminta. Itoe malem iaorang sama sekali tiada bernapsoe boeat makan.

"Ja, Sam So, soedalah," achirnya Jan Giok berkata, "barang soeda ilang, menangis dan memaki begimana djoega, toch traeroeng bakal menjadi pertjoema, malahan berbalik bisa membikin djemoenja itoe Nie-kho, hingga kitaorang mendjadi tiada enak berdiam lebi lama di sini. Begimana djoega ini semoea jalah akoepoenja nasib jang sial, maka paling perloe kita moesti bisa bersabar sadja."

"Barang berharga brapa ratoes tael perak

moesti ilang dengen tjara begitoe gampang,
siapa maoe bikin habis begitoe sadja," dja-
wab Sam So dengen penoe kemasgoelan.
"akoe moesti tjoetji-maki sampe habis - ha-
bisan!"

Itoe malem, Sam So memaki dan mengoe-
toek teroes - teroesan sampe djam doe, ba-
roelah soearanja moelai djadi sirep, apabila
sang rasa ngantoek dateng hinggapin dirinja.
Tetapi koetika baroe sadja bangoen di wak-
toe pagi, soearanja memaki kombali kede-
ngeran begitoe rame.

Sian Leng mengetahoei Jan Giok seka-
rang soeda tiada mempoenjai apa-apa lagi,
hingga dari siapa ia tiada bisa charep pero-
lehken keoentoengan, apalagi meliat Kang
Sam So teroes-teroesan riboet tiada keroean,
ilanglah iapoenja kesabaran, maka ia lantas
dateng ka itoe kamar dan berkata dengan
soeara tiada mengasih:

"Kaloe akoe tinggal diam, kaoeorang tentoe
kira akoe ini ada orang jang terlaloe goblok!
Ketahoeilah, bahoea di doenia ini tiada aken
terdapat pentjoeri berhati baek, jang tjoema
maoe mengambil kaoeorang poenja barang-
barang perhiasan zonder maoe mengarah
laen - laen barang, lagipoen semoea koentji
tinggal baek sebegimana asalnya. Ja, njata

sekali kaoeorang soeda semboeniken barang-barangmoe ka laen tempat dan sengadja riboet ketjoerian, agaknja dengen ini alesan kaoeorang toemplekin itoe tjelahan bahoea akoe setiap hari soegoeken kaoeorang dengen barang santapan jang begitoe tawarsa dan miskin. Tetapi kapan kaoeorang memang rasa ada laen tempat jang lebi baek, akoe toch tiada larang boeat kaoeorang, lantas pinda ka sana. Apa perloe moesti bikin riboet di sini dengen belagan bilang ketjorian?"

Kang Sam So rasaken daranja mendidi setelah mendenger ini perkataän, dengan tiada sabaran ia lantas hendak bales mendamprat pada Sian Leng, tapi baek djoega Jan Giok dengan lekas tarik Sam So bawa ka dalem kamar, seraja berkata dengan separo memoehoen dan soeara pelahan :

"Itoe Nie-kho ternjata ada saorang jang tiada poenja hati kesian, kaloe kita masih djoega maoe berbantahan padanja, oh, Sam So, akoe koeatir dia nanti dateng di roema boeat kasi taoe hal kita pada Thaij Koen, hingga nanti bisa kedjadian boekan sadja kita tiada bakal dapet tempat mondok, tapi djoega dirikoe bisa chadepin bintjana hebat. Ini sebab, Sam So, akoe minta seberapa bisa

kaoe maoe bersabar."

Kang Sam So poen djadi tiada brani bantahan lagi, apabolehboeat ia kepaksa toe-toep moeloet sekalipoen itoe ada bertentangan amat dengen pengrasaän hatinja, hanja ia soeda beli sadja brapa banjak lilin dan hio, pagi-sore ia sembajang di hadepan patoeng Boedha, meminta biarlah itoe bangsat jang mentjoeri barang perhiasan nanti beroleh koetoekan, serta mengakoe sendiri atas perboeatannja.

Blakangan, kira - kira doeä boelan liwat, Tjan Tjhit tiba - tiba beroepa sebagai orang edan dan kerangsokan, mengotje tiada keroean, atjapkali memoekoel kapala dan menam-par moekanja sendiri, serta mengakoe dosanya, bahoea sewaktoe timboel niatan djahat soeda mentjoeri Lauw Siotjia ampoenja barang-barang perhiasan, kasiken pada iapoenja anak boeat didjadiken modal berdagang. Kemoedian ia berkeloeh, Allah aken djatoken pembalesan heibat atas dirinja serta anaknya, jaitoe di kemoedian hari bakal mati sesoeda menangoeng sengsara sekean lama dengan djadi pengemis tersia-sia.

Sekalian padri dari Ban Jan Am baroe taoe terang bahoea bener Lauw Siotjia telah hadepin itoe panasaran, tetapi iaorang

tjoema bisa kitim poelang Tjan Tjhit pada
anaknya boeat diobatin.

Betoel djoega kemoedian Tjan Lee mas-
kipoen soeda dapet itoe harta jang tiada
halal, tetapi tiada selang lama oleh kerna
ia masih djoega soeka teroës berdjoedi, an-
tero poen djadi loedes dan ia kepaksa men-
jadi pengemis di sepandjang djalan boeat
goena sesoeap nasinja.

Sebaliknya Sian Leng jang meliat Jan Giok
sekarang betoel-betoel soeda tiada mempoen-
njai barang soeatoe apa, maoe oesir tiada
ada alesan dan lagi terlaloe menjolok mata,
maka ia soeda sengadja serahken semoea
perkerdjaän, baek enteng maoepoen berat,
boeat dikerdjaken oleh Jan Giok dan Sam
So, selaen itoe ia masih maoe tjari alesan
ini-itoe boeat bisa memaki-maki pada kedoea
prempoean jang bertjlaka itoe.

Tetapi Lauw Siotjia selaloe menerima de-
ngan sabar, menoetji pakean maoepoen laen-
laen perkerdjaän kasar dan berat, selaloe
ia kerdjaken dengan radjin dan tiada perna
mengomel. Baek djoega ada Kang Tjin Hie
jang saben - saben dateng tengokin, serta
kasi sedikit oewang begitoe ia ada poenja.

Trima dari Tjin Hie, zonder berajal Jan
Giok lantas antarken poela pada Sian Leng,

soepaja itoe ketoea bisa merasa seneng ;
begitoe djoega iapoenja bebrapa stel pakean
jang baek, beroelang-oelang telah digadeken,
oewangnja semoea telah dikasiken pada Sian
Leng boeat bantoe blandja makan hari-hari.
Soenggoe kesengsaraän jang moesti dipikoele
oleh gadis kita boekan ketjil adanja.

* *

Sjahdan ditjeritaken Lauw Hong Houw
jang tadinja ada berasal dari bidadari Tjit
Lie di atas langit, kerna soeda bikin per-
djandjian dengen Kim Tong, maka ia di-
toeroenken mendjelma ka doenia boeat men-
djadi permisoeri sri - baginda keizer Goan
Seng Tjong. Ia telah menika toedjoe taon
lebi dan dengen baginda ada idoep manis
serta saling menjinta. Di itoe taon pada
boelan anem, ternjata Lauw Hong Houw
soeda hamil delapan boelan lamanja, jang
membikin dalem hatinja Seng Tjong diam-
diam merasa amat girang. Aken tetapi, Lauw
Hong Houw poenja adjal soeda sampe,
maka pada Lak-gwe Tjhe-dji ia djato ke-
roeron dan ketahoean djoega kandoengan
itee ada satoe poetra lelaki, inilah membikin
sri-baginda djadi sanget menjesel dan merasa
amat sajang bahoea satoe kandoengan jang

berharga tiada njana djadi pertjoema.

Samentara Lauw Hong Houw sedari ke-roeron, dara telah mengalir keloear siang-malem tiada brenti-brentinja, kesakitan jang ditanggoeng tiada terkata heibatnja. Maskipoen thabib - keradjaän (Thaij - ie) dengen jakin beroelang-oelang soeda mengasi obat, tocli semoea tiada menoeloeng, malahan penjakinja sang permisoeri tamba hari tamba berat. Begitoelah sampe di tanggal Tjhe-lak dan Tjhe - tjhit, kesakitan jang ditanggoeng djadi semingkin heibat, hingga sang permisoeri tiada brentinja merinti - rinti dan sesambat dengen soeara memiloeken hati.

Di waktoe soeda malem, Lauw Hong Houw jang merasa adjalnja bakal lekas sampe, ia paksa koeatken badannja berdoedoek di atas randjang. titah dajangnja aken lekas oendang sri - baginda dateng kemari, kerna ada sedikit perkataän jang hendak dirapportken.

Mendenger ini oendangan, baginda Seng Tjong poen boeroe-boeroe dateng ka astana Tjiauw Jang Kiong, tetapi koetika baroe sampe di depan pintoe kamar, Hong Houw tjeplet titah doeae orang dajangnja aken menjega madjoenja sri - baginda sembari meangoetjap :

„Sin Tjhiap lagi terserang oleh ini matjem penjakit djabat, moehoen Pihe tiada masoek ka dalem! Sin Tjhiap poenja djiwa berada dalem ini sekedjap sadja, melaenken ada doea hal jang Sin Tjhiap perloe Pihe ampoenja perhatian.”

„Kaloe ada apa-apa jang dikandoeng dalam hati,” bersabda Seng Tjong dengan soeara tangisan, „bolehlah Keng lantas toe-toerken.”

„Sin Tjhiap sekarang beroesia doeapoe-loetiga taon, dengan Pihe ada idoep saling menjinta toedjoe taon, serta alamin segala kemoeliaän dan keagoengan sebagai satoe permisoeri dalem serba tjoekoep, maka mati poen rasanja poeas dan dengan mata merem. Tetapi sebaliknya Pihe masih belum mendapat toeroenan, samentara Thaij Houw poenja hari - taon jang teroetama poen ada deket sekali, seande Sin Tjhiap soeda mati, soekalah Pihe selekasnya memili di antara poetri - poetri jang bidjaksana, pinter dan berredjeki, boeat diangkat mendjadi Tjhia Kong, soepaja segala apa bisa tjeper berdjalan beres. Dan lagi Sin Tjhiap ampoenja ajah jang ada berasal dari satoe penglima militair, tiada mengarti atoeran dan beradat kasar, sekarang soeda beroesia tinggi, kebanjakam

perboeatannja tiada betoel, maka djikaloe blakang hari ada apa-apa jang kliroe moe-hoenlah Pihe ampoenken padanja serta id-zinken dia poelang ka kampoeng sendiri. Boeat ini boedi besar, sekalipoen Sin Tjhiap mati, tentoelah traoeroeng nanti tjoba moe-hoenken berkah agar soepaja Hong Houw bisa lekas melahirken poetra makota”

„Lantaran kandoengan, Gie Tjhe sampe moesti mengorbanken djiwa, itoelah menandaken kerna Tim poenja redjeki tipis merembet hingga Keng moesti hadepin mara bahaja.” bersabda poela sri-baginda dengan soeara piloe, „maka djikaloe Kok Thio memangnja ada berboeat kesalahan apa - apa, Tim tentoe berlakoe moerah sebisanya soepaja tiada membikin kepiran Keng poenja pesenan.”

Sehabisnya bersabda, baginda laloe balik kombali di roeangan pertengahan astana dan berdoedoek dengan termenoeng - menoeng saorang diri. Samentara itoe, Lauw Hong Houw telah djatoken diri di pemberingan dan bersambat - sambat dengan soeara mengantjoerken hati. Thaij Houw (iboesoeri) merasaken sepoeloe bagian ampoenja sedih hati meliat kesakitan demikian roepa jang ditanggoeng oleh sang njonja mantoe, tetapi

orang soeda tiada bisa berdaja soeatoe apa.

Sampe djam tiga malem, Lauw Hong Houw telah meninggalken ini doenia jang fana dalem keadaän jang amat menjedihken. Baginda Seng Tjong menangis sedih dengen lepaskan soeara keras, sedeng Thaij Houw meratap-ratap dengen soeara jang memiloecken hati. Kemoedian titah beresken itoe mait dan masoekin dalem peti mati dengen oepatjara sebegimana oemoemnjia satoe permisoeri.

Pada pembesar Lee Po Kwa dititah aken siarken soerat selebaran di seloeroeh negri, bahoea berhoeboeng dengen wafatnja Lauw Hong Houw, diminta sekalian rajat negri soeka toeroet njataken kedoeckaän denqen berkaboen, serta dilarang orang boeniken tetaboean atawa berseneng-seneng.

Besok paginja, Lauw Tjiat baroe trimawarta prihal meninggalnja sang poetri, begimana besar iapoenja kesedihan hati, itelah tiada bisa dilookisken dengen kalam. Ia mengarti, dengen begitoe iapoenja pengaroeh poen bakal linjap, seharoesnja siangsang ia wadjib meletakin djabatannja boeat djaoeken mara - bahaja jang satoe waktoe traloepoet bakal menimpa atas dirinja. Aken tetapi, Lauw Tjiat keliatannja masih begitoe

sajang dengen kedoedoekannja, kerna ia selaloe beroepa seperti orang jang moendoer-madjoe aken menetepin tindakannja.

Achirnja pengoeboeran soeda dilangsoeng-ken beres dengen segala oepatjara menoeroet adat istiadat sebegimana selajiknya satoe permisoeri.

Koetika mana, Thaij Houw telah beroesia limapoeloedelapan taon. Lantaran terkenang dan senantiasa menginget Lauw Hong Houw ada satoe njonja jang bidjaksana serta mempoenjai boedi - pekerti jang baek dan adat-lembaga lemah-lemboet, ketjiwa amat dalem oesia moeda soeda moesti mati mereres kerna mengeloearken dara terlaloe banjak. Lagipoen ia merasa menjesel, sebab ini kematian bakal perajahan menghalangin boeat iapoenja hari taon kaänempoeloe jang moestinja terdjadi lagi doea taon. Dengan adanya ini sebab-sebab, membikin Thajj Houw setiap hari-malem selaloe berada dalem kedoekeän dan kesedihan, hingga pelahan-pelahan asabatnja djadi terganggoe dan djato sakit.

Thaij ie (thabib - keradjaän) jang mengobatin, menganggep Thajj Houw jang soeda banjak oemoer ada berbadan lemah, mengoetamaken obat-obat jang bisa menamba-

ken tenaga dan dara, jaitoe Djin Som jang berdasar panas dan tadjem. Maka sesoeda minoem obat toedjoe atawa delapan hari, Thajj Houw ternjata soeda ketedjang dan didesek begitoe keras oleh hawa Som dan laen-laen obat jang mempoenjai pokok panas, membikin dada rasanja terlaloe penoe dan sesek, soesa boeat minoem dan makan ter-oetama bernapas. Kapala dan moeka kliwat panas, napas sebentar-sebentar seperti memboeroe ka atas, hingga beroelang-oelang orang dapetken Thajj Houw dalem keadaän pangsan.

Malem ka delapan, waktoe baroe sadja sijoeman dari klengerja, Thajj Houw panggil Seng Tjong dateng di hadepannja, sambil meninggalken pesenan, oedjarnja:

„Lantaran dojan minoem dan gila paras eilok, serta tiada soeka denger nasehat jang djoedjoer, maka keizer dari keradjaän Song Tiauw moesti hadepken kemoesnaän dan keradjaännya djato dalem tangan kita. Dari itoe, apabila akoe soeda menoetoep mata, kaoe haroes bisa mengoeroes negri dengan jakin dan radjin, maoe denger dan menoeroet voorstel - voorstel jang djoedjoer dari mantri - mantri jang setia, perhatikenlah se-gala kesakitan dan kesengsaraän rajat-negri.

Seande meloepaken dan sia-siaken pri-ke-haroesan dari satoe radja, kemoedian maoe bertobat toch aken tiada ada goenanja!"

Seng Tjong dengen menangis sembari menghiboer katanja :

"Mengapalah Thaij Houw moesti oetjap-ken ini perkataän jang tiada bagoes? Toch dengen kejakinan berobat, bisa dipertjaja sang penjakit lekas semboeh."

"Aij Ke merasa di dada ada berkoempoel satoe toempoekan napas jang seringkali mem-boeroe naek ka atas, maka amat soeker aken bisa diharep boeat idoep lebi lama poela!

Sehabisnya oetjapken ini perkataän, kom-bali Thaij Houw djadi tidoer poeles dengen roepa begitoe goerem dan berat. Sedeng baginda Seng Tjong moendoer dari itoe kamar dan berdoedoek di pertengahan astana dengen pikiran amat roewet dan hati terla-loe kesel.

Tatkala soeda sampe djam lima pagi, sri-baginda lantas doedoek bersemajam di tachta keradjaän, seraja membilang pada sekalian mantri-mantri jang berhadir:

"Soeda delapan hari Thaij Houw dihing-gapin penjakit, seantero Thaij-ie telah mem-bri obat tetapi tiada djoega bisa semboeh,

malahan tamba hari penjakinja keliatan tamba berat. Tadi malem Thaij Houw ada oetjapken perkataän - perkataän mirip orang hendak meninggalken ini doenia, membikin Tim poenja pikiran djadi sanget koesoet. Maka djikaloe di antara Keng sekalian brangkali ada jang kenal thabib-thabib pande, bolehlah lantas dioendjoekin boeat tjoba mengobatin Thaïj Houw, kaloe - kaloe bisa menoeloeng. Seande dengen perantaraän siapa, Thaïj Houw bisa semboeh kombali begimana sediakalanja, nistjaja bakal dikasi premi sepantesnya. Tetapi, boeat ini haroes diaatoer selekas - lekasnya."

Sekalian mantri-mantri sebab pikir sebegitoe banjak Thaïj-ie dalem keradjaän masih tiada ada jang sanggoep menjemboehken Thaïj Houw, apa kata poela boeat thabib-thabib laennja? Ini sebab semoea djadi tinggal boengkem, tiada satoe poen jang brani madjoeken voorstel, kerna koeatir aken kegagalan di blakang jang bisa djoega merembet bintjana kepada orang jang madjoeken voorstelan itoe.

Maskipoen sri-baginda soeda menanja sampe beroelang-oelang, tapi tiada djoega bisa dapet penjaoetan soeatoe poen; sampe paling achir, baroelah keliatan Nio Siang ber-

diri dari tempat doedoeknya, sambil merap-
port katanja :

„Sin telah menerima Pihe doeа toeroenan
ampoenja boedi besar, dengan keridlahan
hati sekarang maoe menanggoeng satoe orang
boeat mengobatin Thaij Houw sehingga sem-
boeh.”

„Tim pertjaja, Keng ada satoe mantri be-
sar jang djoedjoer serta telah beroesia lan-
djoet, lagipoen mempoenjai pengalaman loe-
as.” sabdanja sri - baginda dengan girang.
„tentoenja apa jang divoorstelken boleh di-
andelken. Aken tetapi, belon taoe orang si-
apakah jang Keng hendak maksoedken, tjo-
balah oendjoekin dengan lekas ?”

„Bahoea sedari Sin telah poengoet mantoe
Lee Koen Giok, seisi roema, lelaki dan prem-
poean maoepoen toeа dan moeda, kaloe sa-
dja katerdjang penjakit begimana djoega; se-
laloe ada diobatin oleh Siauw Saij sendiri
dan sebegitoe sering ampir tiada perna ke-
liatan gagalnja, malah tiada ada jang tiada
semboeh kapan memake obatnja,” demikian
oedjarnja Nio Siang. „ditilik dari sini, Sin
beranggепan Lee Koen Giok tentoe mengarti
baek dalem ilmoe kethabiban, maka itoe
bolehlah Pihe tjoba pake padanja boeat me-
ngobatin Thaij Houw poenja penjakit.”

Seng Tjong djadi terprandjat setelah mendenger ini rapportan, kemoedian berkata:

„Boekannja Tim terlaloe berhati bimbang, tapi Keng haroes pikir Lee Koen Giok ada orang jang masih beroesia amat moeda, bener diapoenna ilmoe soerat djarang bandingan, menandaken jang dia selaloe berjakin soeng-goe - soenggoe aken itoe, maka moestail sekali dia bisa mempoenjai kesempetan boeat pahamken poela ilmoe kethabiban.”

„Tetapi Sin djoega soeda madjoeken ini voorstelan boekan zonder alesan, atawa setjara memboeta-toeli, hanja tersoeroeng oleh sang hati jang tiada tega setelah mengetahoei Thajj Houw menangoeng penjakit demikian roepa,” berkata Nio Siang lebi djaoe, „hareplah Pihe soeka serahken ini tanggoengan pada Lee Koen Giok dan Sin bra-ni pastiken tiada bakal terjadi kegagalan soeatoe apa.”

„Soeda njata Nio Kong tiada perna berboeat teledor dalem segala perkara, begitoe djoega Lee Koen Giok soeda keliatan bisa kerdjaken segala apa dengen sanget tertib dan ati - ati,” begitoelah achirnja Kie Siang toeroet tjampoer bitjara, „ini sebab, Sin harrep Pihe soeka pake Lee Koen Giok boeat mengobatin Thajj Houw, dan dia tentoe ti-

ada aken berboeat soeatoe kegalalan."

"Mendenger Keng berdoea ampoenja rapportan begitoe soenggoe soenggoe, ja, Tim djoega tiada bisa berboeat laen daripada menoeroet sadja," achir - achir sri - baginda telah bersabda. "Nio Sianseng, Tim minta Keng soeka lantas pergi panggil Koen Giok dateng kemari."

Dengan zonder berajalan, Nio Siang sigra djoega berlaloe dari kraton Kim Loan Tiao, berdjalanan keluar pintoe Ngo Boen, langsung doedoek djolinja balik poelang ka gedongnya dengan tjepe. Setelah sampe, ia lantas toetoerken hal baroesan pada Lee Beng Tong, kemoedian mengadjak sang manto aken soeka selekasnya ikoet padanja boeat bersama-sama mengadep sri-baginda.

Sebelonnja Beng Tong bisa menjaoet apa-apa, terlebih doeloe So Hoa telah berkata dengan sorot moeka seperti orang tiada seneng :

"Ach, njatalah Hoetjin soeda koerang pikir ! Thaij Houw telah beroesia ampir deket anempoeloe taon, samentara Thaij-ie masih tiada sanggoep menjemboehken, maka sekali poen mantoemoe mempoenjai sedikit pengartian hal thabib, tapi itoe masakah boleh diandelken boeat mengobatin penjakit jang

kenjataän soeda terlaloe berat? Seande ke-moedian terjadi kekliroean hal mengasi obat, tidakah bisa membikin djiwa sendiri djadi terantjem? Dari itoe, ada lebi slamet kaloe djangan pergi! Keng Hoedjin djoega toeroet seselin sang soeami, seraja membilang:

„Betoel sekali Thaïj Soë soeda sengadja tjari poesing sendiri! Semoea mantri di keradjaän tiada satoe djoega jang brani boeka soeara, itoelah menjataken ini perkara ada satoe soeal jang amat berat, tetapi sebaliknya kaoe soeda berlakoe begitoe tjerobo, maoe bawa mantoemoe pergi hadepin soeatoe mara bahaja.”

„Kaloe tjoema satoe sobat sadja jang dapet penjakit, akoe tentoe tinggal boengkem,” berkata Nio Siang sebagai penjangkalan, „tetapi ini terhadep pada satoe radja jang terdjoendjoeng tinggi, begimanalah akoe bisa tinggal liatin sambil pelok tangan dan tiada maoe tjoba bri pertoeloengan? Apalagi Beng Tong toch tjoekoep teliti dan taoe apa jang haroes dibikin, maka itoe biarlah kaoeorang djangan kesoesoe berkoeatir sampe begitoe djaoe.”

Samentara itoe Beng Tong soeda prenta boedak prempoeunna mengambil iapoenia

pakean kebesaran, sembari berpakean kedengeran ia berkata:

„Ja, ini toch boekan ada satoe perkara besar, dengen mengandel sama pengalaman sang djeridji, Siauw Saij nanti memereksa penjakit Thajj Houw, jang kapan merasa bisa semboeh, baroelah dikasi obat, sebaliknya tida, kaloe ketahoean penjakit soeda soesa ditoeloeng.”

Kemoedian ini mertoea dan mantoe laloe pada doedoek masing-masing djolinja, serta brangkat menoedjoe ka kraton Kim Loan Tian, jang apabila sampe sigra djoega berbareng toeroen dari djolinja, sedeng Nio Siang lebi doeloe soeda masoek mengadep ka dalem kraton, sembari merapport katanja:

„Lee Koen Giok sekarang soeda berada di loear Ngo Boen dan lagi menoenggoe titah !”

Baginda poen lantas titah boeat sigra siyahken itoe anak moeda masoek mengadep. Siapa setelah berada di hadapan Seng Tiong, laloe mendjalanken kehormatan sebegimana oemoemna satoe mantri djoempaken iapoenja sri - djoendjoengan. Kemoedian baginda panggil Lee Koen Giok akan dateng lebi deket, seraja membilang:

„Biarlah Keng bisa berkerdja soenggoe-

soenggoe boeat mengobatin Thaïj Houw. Tim harep bisa lekas semboeh dan Keng tentoe bakai menerimaän sepantesnja." "Baeklah Sin lebi doeloe masoek dalem astana boeat memereksa Thaïj Houw ampoenja mek," djawab Beng Tong. "kemoedian baroe bisa pikir begimana moesti berboeat."

Baginda laloe keloearken titah soepaja sekalian mantri - mantri boleh sigra boebaran, baroelah baginda bangoen dari kedoedoek-annja serta naek ka iapoenja kendaraän, sedeng Beng Tong dengen djalan kaki mengikoet masoek ka dalem astana.

Itoe waktoe di kraton iringan ada terdapat delapan orang Thaïj - ie jang lagi berdame satoe sama laen boeat menjotjokin recept obat mana jang baek; apabila dapet taoe tentang kedatengan sri - baginda, laloe pada bersama - sama keloear menjamboet. Baginda soeda toeroen dari kandaraännya dan titah sekalian Thaïj - ie boleh menoeng-goe sadja di itoe kraton, kerna ia hendak bawa Lee Beng Tong masoek ka dalem astana boeat memereksa meknja Thaïj Houw, kemoedian tentoe ada apa - apa jang perloe diperdameken bersama-sama.

Begitoelah Beng Tong telah ikoetin ba-

ginda masoek ka astana Ban Sioe Kiong, teroes ka dalem kamarnja tidoer dari Thaïj Houw, di mana Beng Tong disilahken doe-doeck di satoe samping. Tetapi baroe sadja berselang sesaät lamanja, Beng Tong kedenegeran berkata :

„Marilah Sin tjoba preksa mek, soepaja bisa taoe penjakit apa adanja.”

Baginda lantas samperin pembaringan Thaïj Houw, boeka sebentar klamboenja dan atoer baek segala apa jang moesti, baroe kemoe-dian Beng Tong dateng di depan pembaringan dan berloetoet di sitoe aken moelai preksa si sakit ampoenja nadi tangan, sedeng baginda ada menoenggoe dan mengawasin di samping.

Sesoeda rampoeng memerekxa, Beng Tong lantas berkata :

„Harep bisa meliat sebentar Thaïj Houw poenja aermoeka.”

Seng Tjong poen lantas boeka sebagian dari klamboe itoe dan Beng Tong mengam-pirin semingkin deket sambil mengawasin dengen teliti. Ia dapet liat Thaïj Houw lagi tidoer njenjak dalem keadaän begitoe peteng dan berat, moekanja mera sebagi kebakar dan bibirnya poetjet seperti tiada ada dara-nja. Beng Tong meraba-raba kapalanja Thaïj

Houw dengen pelahan sama iapoenja telapakan tangan, ia merasaken di itoe bagian ada begitoe panas.

„Biarpoen betoel Thaij Houw ampoenja sakit keliatannja berat,” berkata Beng Tong sembari berlaloe dari depan pembaringan, „tetapi kaloe brani memake Sin poenja obat, tanggoeng minoem tiga thiap, penjakit ini aken sigra baekan separo.”

Baginda keliatan masih bersangsi boeat itoe penjanggoepan dari Beng Tong, tapi ia bersabda :

„Baeklah, Keng boleh bersoenggoe-soenggoe hati mengatoer recept, kapan Thaij Houw bisa waras, Keng tentoe nanti di koerniaken gandjaran jang setimpal!”

Beng Tong berdoedoek kombali di tempatnya baroesan, sambil berpikir-pikir dalem hatinya bahoea Thaij Houw poenja toeboeh tiada bisa dibilang lemah, tjoemalah tersebab terlaloe berdoeka dan bersedih hati, maka njia mendapat ini penjakit. Thaij-ie ampoenja obat kebanjakan terdiri dari segala tjampooran Djin Som dan sari-sari obat koeat jang panas dan keliwat keras, maka itoe soeda tiada bisa menoeloeng, malahan semingkin membahajaken.

Kemoedian ia laloe menoelis satoe recept

boeat memboejarken panas, sedeng saorang Thaij Kam jang memang senantiasa ada menoenggoe di sitoe, telah trima itoe soerat obat, serta persembahkan ka hadepan sribaginda. Dan Seng Tjong apabila soeda meliat itoe recept djadi sanget terkedjoet, seraja berkata pada Lee Beng Tong:

„Ini recept meloeloe terdiri dari obat-obatan boeat memetjaken panas, tiada halangan boeat diminoem oleh orang moeda, sebaliknya Thaij Houw jang telah beroesia ampir anempoeloe taon, tiada bisa disangkal ada berbadan lemah, tiada tahan dengen ini obat, hanja haroes minoem obat jang mempoenjai sari mengoeatken dan menamba dara. Ja, Thaij Houw poenja penjakit soeda djadi begini berat, seande moesti pake lagi ini obat, dikoeatir bisa menambaken bahaja, itoelah boekan ada satoe perkara ketjil.”

„Sebetoelnja Thaij Houw tadinja tiada poenja penjakit berat, tapi lantaran kena didesek oleh pengaroehnja Som jang terlaloe kebanjakan, hingga hawa panas memboeroe naek ka atas dada, mendjadi sesek saking kepenoean. Maka itoe, perloe sekali minoem ini obat boeat bikin boejar itoe hawa Som jang berkoempoel di betoelan dada, baroe dikasi minoem lagi obat boeat pen-

tjernaän, soepaja bisa mendatengken napsoe makan, dari sitoe hawa peroet dan tiapas menjadi bisa kombali sebegimana biasa, kemoedian laloe dikasi sedikit obat-obat boeat menamba kekoeatan, dengen begitoe senantro penjakit lantas djadi silang. Hareplah Pihe djangan bersangsi poela dan maoe pertjaja Sin poenja oetjapan!"

„Maskipoen Keng poenja perbilangan ada betoel, tapi Tim traoeroeng masih berslempang, lantaran mengingét Thaïj Houw ampoenja oesia jang tinggi," demikian bersabda poela baginda Seng Tjong. „sekalian Thaïj-ie ini waktoe masih berada di kraton iringan, tjobalah Keng bawa ini recept dan berempoek dengen marika, kaloe ternjata bisa dipake baroelah kemoedian boleh digoenaken."

„Memang djoega Thaïj-ie boekannja tiada bersoenggoe-soenggoe hati, tjoema kliroenja jalah sama beranggepan Thaïj Houw ada berbadan lemah dengen didasarken pada itoe oemoer tinggi, maka bisa dipastiken diaorang aken tiada brani goenaken ini matjem recept," Beng Tong berkata poela, „dari itoe, Pihe haroes bisa mengambil poetoesan sendiri selekasnya, agar soepaja tiada sampe menampak kegagalan lebi djaoe."

„Pengalaman sendiri traoeroeng masih gelap,

tapi pendapatan dari banjak orang tentoe
ada lebi terang," kemoedian baginda berkata
lagi, sembari titah Thaij Kam, Koan Tjiang,
aken bawa ini recept bersama - sama Beng
Tong pergi ketemoeken Thaij-ie boeat minta
pertimbangan begimana jang baek.

Apabolehboeat Beng Tong kepaksa me-
ngikoet Koan Tjiang dateng ka itoe kraton
iringan, di mana ia disamboet oleh sekalian
Thaij-ie, atawa setelah saling membri hor-
mat sebegimana lajiknja, laloe sama - sama
berdoedoek.

Koan Tjiang lebi doeloe menjampeken sri-
baginda ampoenja titah, baroelah kemoedian
ia mengoendjoekin itoe soerat obat dari Lee
Beng Tong. Samentara sekalian Thaij - ie
apabila soeda meliat itoe recept, masing-
masing pada menggojang - gojang kapala,
serta berkata dengen soeara ampir berbareng:

„Orang moeda memang berdara panas
dan berhati kakoe, begitoe tjerobo brani
pake ini matjem recept jang berbahaja. Och,
nekat soenggoe !”

Kemoedian dengen berpaling pada Koan
Tjiang, marika berkata poela :

„Hareplah Kong - kong toeloeng merap-
portken ka hadepan sri - baginda, bahoea
kitaorang ampoenja tjara mengobatin, me-

laenken taoe kapan sesoeatOE orang jang soeda beroemoer terserang penjakit, haroes goenaken obat-obatan jang mengandoeng sari menamba dara dan tenaga boeat menjemboehken. Tetapi sekarang Lee Han Lim ampoenja tjara mengobatin ada loear biasa sekali serta amat bertentangan, kitaorang djadi tiada brani tjampoer bitjara ; lebi djaoe kitaorang poen merasa perloe menerangken, seande memake djoega ini obat, bila blakangan terdjadi apa-apa jang koerang baek. itoelah sama sekali tiada bersangkoetan de-neng kitaorang."

Beng Tong merasa geli dalem hatinja, diam-diam ketawaken itoe sekalian Thaij-ie jang tiada mengarti betoel hal memereksa orang sakit, berbalik maoe salaken laen orang poenja recept kliroe tempatnja, maka tiada heran ada banjak thabib-thabib jang belon paham betoel atjapkali menjesatken orang poenja djiwa.

„Menoeroet pendapetankoe jang bodo,” achiRNA Beng Tong sacetin perkataänna itoe sekalian Thaij-ie, „ini obat sama sekali tiada terdapat kekliroeannja. Kaloe kemoedian ada apa-apa, tentoe sadja semoea kesalahan ada mendjadi tanggoengankoe sendiri.”

Semoea Thaij-ie jang menginget dia ini

selaen ada satoe Han Lim, djoega ada mendjadi mantoe jang tersajang dari Nio Siang. mendjadi tiada ada jang brani banjak bitjara poela boeat berbanta, tjoema doeа di antaranja jang paling toeа tjoba memboedjoek serta membri nasehat pada anak moeda kita, katanja :

„Kaloе Sian Seng sendiri memang soeda maoe tanggoeng apa jang bakal terjadi di kemoedian, tentoe sadja kitaorang boleh traoesa toeroet tjampoer. Tetapi, haroes djangan diloepaken, bahoea Thaij Houw ada satoe orang sakit jang telah beroesia tinggi, maka itoe perloe sekali moesti dikasi minoem obat penamba kekoeatan, boekannja sebegimana apa jang Sianseng telah keloearken.”

„Trima kasi,” menjaoet Beng Tong, „tapi akoe lebi pertjaja jang ini obat bakal mendjadi lebi mandjoer !”

Sehabisnya oetjapken ini perkataän, laloe bersama - sama Koan Tjiang, Beng Tong balik poela ka dalem astana taken mengadep sri-baginda.

XXXIV.

Lee Beng Tong naek pangkat mendjadi
Siang Sie. Khong Djia San beroleh
koerniaän gelaran Tiong Hian.

Sjahdan Koan Tjiang bersama Lee Beng Tong setelah balik kombali dalem astana, sigra djoega itoe Thaij Kam merapportken pada sri-baginda semoea apa jang telah dibitjaraken oleh sekalian Thaij - ie baroesan. Seng Tjong poen djadi berada dalem keadaän serba - sala dan tiada bisa lantas mengambil poetoesan. Samentara itoe Beng Tong soeda madjoe berloetoet di hadepan sri-baginda sembari membilang:

„Sesoenggoenja Thaij Houw ada mendjadi korban lantaran terlaloe banjak pake obat - obat panas. Kaloe sesoedanja pake Sin poenja obat, terjadi apa - apa jang koerang baek, Sin ridlah aken trima hoekoeman jang paling berat. Inilah sebetoelnja meloeloe boeat oendjoekin Sin poenja kesetiaän hati, kerna tiada tega meliat Thaij Houw menanggoeng siksaän begitoe roepa. Ja, Pihe, Sin harep djanganlah berajal poela dan lekas menjediaken obat soepaja bisa lantas diminoem.”

Meliat Beng Tong ada berlakoe begitoe

soenggoe-soenggoe serta pertjaja betoel dengan pendapetannja, baginda laloe bersabda;

„Memang djoega dalem segala hal Keng selaloe ada berkerdja dengan ati - ati, maka tida - dapet - tida Tim poen haroes pertjaja atas Keng poenja pendapetan. Baeklah, dengan berlakoe nekat-nekatan Tim aken goenaken djoega ini obat.”

Sesoedanja bersabda, baginda lantas titah boleh sigra sediaken obat menoeroet apa adanja itoe recept. Dalem begitoe, keliatan saorang Thaïj Kam telah masoek merapport katanja :

„Semoea Thaïj - ie meraportken, bahoea kerna Lee Han Lim ampoenja tjara mengobat ada amat bertentangan, sepantesja matrika haroes oendoerken diri.”

Seng Tjong membenerken itoe perbilangan serta keloearken prenta jang sekalian Thaïj - ie diüdzinken boleh moendoer. Sedeng Beng Tong itoe tempo telah menimbang dan preksa betoel obat-obat jang bakal dipake.

„Sekarang Keng boleh pergi mengaso ata-wa menginep di Lam Kok,” bersabda baginda kemoedian pada Beng Tong, „agar kapan ada terbit perobahan apa - apa atas Thaïj Houw, dengen gampang Keng bisa dioendang kemari boeat menilikin.”

Berbareng dengan habisnya ini oetjapan, sri-baginda prenta si Thaïj Kam, Koan Tjiang, aken lantas mengantar Beng Tong ka Lam Kok, jaitoe seboeah loteng terletak di bagian blakang jang terpisa tiada seberapa djaoe dari astana. Samentara Seng Tjong sendiri telah lakoeken penilikan hoeat itoe obat jang lagi dimasak oleh dajang-dajangnya.

Apabila obat soeda mateng dan berada pada bagiannya jang betoel, sang dajang lantas hendak persilahken Thaïj Hauw minoem, tapi Seng Tjong menjega dan sabdanja :

„Djanganlah kesoesoe !”

Ia pikir, ini obat kaloe berhasil tentoelah penyakit bisa tersapoe sebagian, sebaliknya kapan tiada menoeloeng, nistjalah djiwa bakal toeroet terantjem. Sesoenggoenja inilah ada seroepa perdjoangan jang amat heibat dan orang belon bisa pastiken oentoeng tjlakanja. Dalem baginda lagi bersangsi, serba-sala, djoestroe Thaïj Houw telah mendoesin sembari menanja :

„Apakah Thaïj - ie soeda mengeloearken obat ?”

„Lantaran Thaïj - ie sebegitoe lama mengobatin belon djoega bisa menoeloeng, maka Nio Siang telah voorstelken diapoena man-

toe, Lee Koen Giok, jang skatanja paham betoel ilmoe thabib," djawabnja baginda, "baroesan Koen Giok poen soeda lakoeken pemereksaän dan keloearken soerat obat, begitoe djoega obatnja baroe sadja disedia mateng."

"Ja, kaloe soeda mateng, mengapa tiada lekas panggil Aij Ke boeat minoem?" Thaij Houw menanja lagi.

"Tjoemalah," saoet baginda dengen coepa penoe kesangsian, "obatnja Lee Koen Giok meloeloe terdiri dari tjampoeran boeat memetjaken panas, dari itoe tiada brani lantas kasi minoem pada Thaij Houw."

"Soeda njata obat Po tiada oendjoek hasilnya, atawa obat memetjaken panas bisa djadi bakal menoeloeng, siapa taoe?" begitelah oedjarnja Thaij Houw lebi djaoe, "hajo lekas bawa kemari itoe obat, soepaja bisa diminoem."

Boeat sesaät, kombali baginda djadi berpikir dan berkata dalem hatinja:

"Ja, inilahi boleh djadi soeda takdirnja Toehan! Biarpoen nanti bakal mendatengken apa - apa jang koerang baek, itoe toch ada maoenja Thaij Houw sendiri jang dengan ichlas hati soeka minoem ini obat. Apabolehboeat, biarlah kita pastahken sadja pada

Allah, begimana nanti djadinja."

Baginda laloe prenta dajang - dajangnya boeat angkat Thaij Houw berdoedoek di pinggir pembarangan, sedeng ia sendiri lantas angkat tjangkir obat dan kasi minoem pada Thaij Houw dengen ati - ati. Soeda itoe, Thaij Houw dikasi berbaring lagi dengan baek dan dislimoetin rapet serta toeroenken poela klamboenja.

Apabila semoea soeda mendjadi beres, baginda bersama laen-laen orang sigra djoega pada berlaloe dari kamar terseboet. Di roeangan pertengahan astana Seng Tjong berdoedoek dengen hati berkoeatir, senantisa memperhatiken segala keadaän dari gerak-gerakannya Thaij Houw. Tiada antara lama, orang dapetken sang iboesoeri tidoer njenjak dan teroes - meneroes sampe lohor belon djoega mendoesin, hingga kekoeatirannya sri-baginda djadi semingkin besar. Ia bertindak masoek ka dalem kamar, memboeka klamboe dan dapetken Thaij Houw tidoer poeles dengen anteng, hawa mera di moekanja soeda soeroet, bibir jang tadinja poetjet sekarang beroba semoe-semoe mera, hawa panas di atas kapala poen rada - rada moendoer. Baginda mengarti, sang obat soeda moelai oendjoek hasilnja, dengen hati lega

ia balik berdoedoek lagi di kedoedoekannja baroesan, seraja membilang pada siapoenna djoeroe-lajan :

„Ach, soenggoe bisa bikin orang djadi panasaran, pertjoema sadja namanja menjadi Thaij-ie, tetapi tiada bisa menangin Lee Beng Tong, satoe anak sekolahan jang baroe beroesia bilang blas taon, siapa melaenken dengen satoe thiap obat boejarken panas, Thaij Houw poenja penjakit lantas djadi baekan brapa bagian, inilah amat menggirangken !”

Ia lantas prenta Thaij Kam tjepeet soeroe sediaken ampat mangkok masakan berikoet satoe botol arak, antarken ka Lam Kok soepaja Lee Koen Giok bisa minoem dan makan dengen leloeasa.

Waktoe matahari moelai dojong ka sebla barat, Thaij Houw baroe kedapetan mendoesin, samentara baginda poen lekas masoek djoempaken sembari tanjaken keadaännja itoe iboe.

„Terlaloe,” berkata Thaij Houw, „dan bisa bikin orang djadi ketawa, bahoea seantero Thaij - ie tiada satoe poen jang bisa melebiken Koen Giok ! Sekarang Aij Ke rasaken dada tiada begitoe sesek lagi, napas djoega bisa berdjalan betoel, maka selan-

djoetnja biarken Koen Giok sadja jang me-
ngasi obat. Melaenken moeloet rasanja aoes,
kepingin minoem setjangkir thee jang bagoes.”

Baginda lantas prenta saorang Thaij Kam
aken lekas pergi tanjaken Koen Giok, ba-
hoea Thaij Houw baroe sadja mendoesin,
panas soeda koerangan, tapi apa boleh dikasi
minoem aer thee, begitoe djoega apa perloe
dilakoeken pemereksaän lagi atawa pake
obat?

Thaij Kam jang diprenta, setelah berlaloe
sedikit lama, balik kombali merapport pada
baginda:

„Lee Han Lim membilang, sebab obat
baroe djalan tiada boleh terlaloe didesek,
biarlah besok pagi dilakoeken lagi pemerek-
saän serta dikasi obat. Aer thee jang baek
boleh diminoem, tapi sekali - kali djangan
minoem thee tjampoer Som.”

Baginda laloe titah sedoehken thee jang
paling baek, sedeng kemoedian sesoedanja
minoem satoe tjangkir thee, tiada lama Thaij
Houw djadi tidoer poeles kombali. Baginda
Seng Tjong semingkin rasaken lega di hati
dan itoe malem ternjata berdjalan dengan
tiada kedjadian hal apa - apa.

Pagi-pagi sekali dari kaesokannja, baginda
dapatken Thaij Houw masih tidoer njenjak,

sigra djoega ia titah orang panggil Koen Giok dateng ka itoe astana, silahken ini Han Lim berdoedoek dengen disoegoeken thee wangi, sambil baginda mengalem katanja :

„Waktoe Tim kemaren meliat Keng poenja soerat, obat merasa amat terkedjoet dan berkoeatir, tetapi kerna Thaij Houw sendiri berkeras hendak minoem, Tim djadi tiada bersangsi lagi. Sekarang panasnja soeda koe-rangan serta beroleh pengrasaän njaman, semaleman bisa tidoer enek. Selandjoetnja biarlah Keng soeka mengobatin dengen jakin, tentoe kemoëdian dikernoïaken gandjaran sepantesnya”

„Tentoe sekali Sin nanti berkerdja dengen soenggoe - soenggoe hatib boeat membales Pihe ampoenja boedi besar jang tertimpa atas diri Sin, serta itoe kepertjajaän jang terserah atas Sin poenja poendak.”

Kemoëdian baginda lantas bawa Beng Tong ka dalem kamar, boeat lakoeken poela pemereksaän nadi tangannja Thaij Houw; sesoeda beres, ini mantri dan radja balik kombali berdoedoek di roeangan astana, di mana Lee Koen Giok telah merapport katanja :

„Thaij Houw ampoenja panas maski betoel soeda moendoer, tapi makanan jang

berkoempoei masih belon antjoer betoel, maka sekarang haroes digoenaken obat boeat pentjernaän, soepaja apa jang berkoempoel di dada bisa dilaloeken, baroelah kemoedian dikasi minoem obat menamba kekoeatan sekedarnja, dengen begitoe segala akar penjakit mendjadi tersapoe bersi."

„Ja, bite semoea melaenken mengandel atas Keng poenja kejakinan.” bersabda baginda, „tetapi kapan ternjata Thaij Houw soeda moelai semboeh, baroelah Keng boleh poelang ka gedong sendiri.”

Begitoelah Beng Tong soeda toelis pcela satoe soerat obat boeat pentjernaän, serta timbang betoel obat-obat bahan; apabila ini semoea mendjadi beres, baroe ia balik lagi ka Lam Kok. Samentara baginda Seng Tjong poen masoek ka dalem, tengokin dajang-dajangnya masak obat, jang kapan soeda mateng, laloe disilahkan Thaij Houw minoem obat itoe.

Berselang sedikit saat, Thaij Houw rasakan peroetnja sedikit moeles, maka dengan tertointoen oleh Kiong Lie-Kiong Lie, Thaij Houw bangoen boeang aer, jang sesoedanja itoe Thaij Houw moelai rasakan dadanja banjak lega, berbareng peroet poen rasakan lapar.

Koetika dapat taoe ini hal, baginda boer-toe-boeroe menitah sala saorang djoeroelajannja aken pergi tanjaïn pada Lee Han Lim dan Beng Tong membri advies soepa-ja disoegoeken sedikit boeboer entjer.

Kaloe Thaij Houw soeda makan boeboer, sigra djoega ia rasaken pikirannja mendjadi terang, begitoe poen bisa dapetken pengrasaan njaman, serta moelai maoe omong banjak jang dibarengin dengen ketawa-ketawa seneng.

„Ja, kaloe sadja Aij Ke sekarang bisa terlopoet dari kematian, itoelah semoea ada djasanja Lee Beng Tong saorang,” begitoe-lah di satoe koetika Thaïj Houw telah membilang pada sang poetra, „dari itoe, Aij Ke sanget harep, biarlah Beng Tong nanti di-koerniaken dengan gandjaran besar, agar tiada sia-siaken orang poenja pertoeloengan dan ketjapean.”

„Memang begitoe ada seharoesnja,” djawab baginda, „dan soenggoe tiada dinjana, bahoea Beng Tong jang masih beroesia begitoe moeda, bisa mempoenjain pengetahoe-an begitoe roepa, sedeng sesoeatoe obat jang diatoer olehnya ternjata ada amat mandjoer dan tjotjok betoel.”

Itoe hari soeda liwat dengen tiada ter-

djadi hal-hal jang penting.

Pagi katiga, Beng Tong telah dateng kombali ka dalem astana boeat preksa penjakinja Thajj Houw, kemoedian laloe keloearken recept dari obat-obatan penambak kekoeatan serta dara.

„Njatalah Keng soeda berkerdja banjak tjape,” begitoelah berkata baginda pada Beng Tong setelah beres menjediaken obat, „biarlah sekarang Keng boleh poelang ka gedong sendiri, sedeng setiap pagi haroeslah Keng tiada loepa dateng kemari koeat preksa penjakit dan kasi obat, sampe Thajj Houw djadi semboeh betoel.”

Mendapat ini titah, Beng Tong poen lantas berlaloe dari dalem astana, berdjalan keloear sampe di pintoe Ngo Boen, baroe dari sitoe ia doedoek djoli menoedjoe ka gedongnya Nio Siang, langsoeng masoek ka pertengahan blakang, di mana djoestroe terdapet Keng Hoedjin bersama So Hoa lagi doedoek membitjaraken halnja Beng Tong, jang disertaken dengen roepa-roepa pengrasaan berkoeatir, kerna soeda tiga hari belon djoega keliatan poelang.

Alangkah girangnya marika itoe koetika sekoenjoeng - koenjoeng menampak Beng Tong telah moentjoel di sitoe; maka begi-

toe lekas sesoedanja satoe sama laen menjalanken kehormatan selajiknja, atawa Beng Tong baroe sadja ambil tempat doedoek, dengen soeara ampir berbareng Keng Hoedjin bersama poetrinja telah menanja :

„Sedari kaeo masoek dalem astana, kita orang siang-malem tiada sekali bisa merasa seneng dalem hati. Tetapi, apakah jang soeda terjadi atas dirimoe? Begimana Thaij Houw ampoenja penjakit?”

„Prihal dirikoe, itoelah boleh traoesa dikoeatir,” saoet Beng Tong, „sedeng Thaij Houw ampoenja penjakit boleh dibilang soeda semboeh lebi dari separo. Diobatin lagi brapa hari, pasti seantero penjakinja bisa linjap dan Thaij Houw aken djadi waras poela sebegimana biasa.”

Mendenger ini penjaoetan Keng Hoedjin dan So Hoa baroe merasa lega di hati, sementara Nio Siang jang dari setadian tinggal diam sadja, sekarang kedengeran berkata sembari ketawa :

„Begimana? Akoe toch soeda mendoega pasti Beng Tong tiada aken membikin oeroesan menjadi gagal barang sedikit, maka itoe akoe brani madjoeken voorstel di hadepan sri-baginda, serta peringetken djoega boeat kaeorang djangan terlaloe berkoeatir.

Na, sekarang toch semoea apa telah berdjalan beres, malahan kitaorang boleh harel Beng Tong nanti trimab gandjaran loear biasa."

Setelah berdoedoek sedikit lama poela, So Hoa soeami - istri lantas berlaloe dari sitoe dan sama-sama masoek ka dalem kamarnja sendiri, di mana So Hoa berkata sambil memoedji :

„Soenggoe soeker bisa didapetken orang jang mempoenjain kepinteran seperti Siotjia, hingga bisa melebiken daripada Thaïj-ie dalem hal menoeloeng orang sakit !”

„Ja, kaloe akoe soeda berlakoe nekat mengobatin Thaïj Houw, jalih mengharep aken beroleh pangkat lebi besar.” katanja Beng Tong, „dengan begitoe, baroe akoe bisa dapetken djalan boeat menoeloeng seroema tangganja soeami dan boekanlah tjoema semata - mata perloe mentjari kebesaran nama.”

„Ampir saben saat Siotjia senantiasa tra-loepoet pikir dan berichtiar boeat bisa menoeloeng bakal soeami,” berkata So Hoa, „Allah tentoe membri berkah, hingga apa jang terkandoeng dalem angen-angen, lekas kesampean !”

„Ja, itoepoen melaenken terserah kapada

takdirnja Toehan," saoet Beng Tong, „dan kita hanja boleh menoenggoe serta meliat apa jang bakal kedjadian."

Esok paginja, Beng Tong kombali telah masoek ka dalem astana, atawa setelah mereksa Thaiij Houw ampoenja nadi, ia lloe menoelis poela satoe recept dan timbang beres obatnja, baroe kemoedian berlaloe dari sitoe, dateng poela ka kraton dan merapport ka hadepan sri-baginda, oedjarnja :

„Thaiij Houw poenja panas soeda moendoer betoel, sedeng djalannja napas poen moelai tetep sebegimana biasa, hareplah Pihe tiada berkoeatir lagi.”

„Itoelah soekoer sekali,” bersabda baginda dengen aermoeka bersri-sri, „dan biarlah Keng dengen meloepaken tjape, seteroesnya saben pagi maoe dateng dalem astana boeat preksa penjakit serta keloearken obat sampe Thaiij Houw djadi semboeh betoel, kemoeedian Tim tentoe membri gandjaran jang berharga.”

Beng Tong hatoerken trima kasi dan berlaloe dari sitoe boeat balik poelang ka gedongnja.

Samentara pada besok paginja lagi, kombali Beng Tong dateng di dalem astana dan sebegimana sari - sarinja, begitoe djoega ini

kali dengen berloetoet di depan pembaringan, ati ati ia preksa Thaij Houw ampoenja nadi tangan. Djoestroe itoe waktoe Thaij Houw mendadak bangoen dari poesnja dan memboeka kedoea matanja ; tapi kerna berada dalem klamboe. Beng Tong djadi tiada merasa apa - apa, lagipoen itoe koetika sia ada begitoe asik melakoeken pemereksaän atas meknja si sakit, boeat mana ia goenaken antero perhatiannja, sampe iapoenna semangat jang aseli dan paras jang sedjati sebeginana keadaännja orang prempoean, terpeta sedjelas-djelasnya. Apalagi dengen berloetoet di depan pembaringan, iapoenna pakean kebesaran djadi teraling sebagian besar, hanja jang tertampak njata jalah iapoenna separo badan bagian atas.

Dari blakang klamboe, Thaij Houw memandeng orang poenja roman dengen teliti, maka ia lebi pertjaja bahoea di depan matanja ada terdapet saorang gadis tjantik jang menjaroë pakean lelaki, sebaliknya daripada satoe lelaki soenggoean. Achirnya ia djadi berpikir dalem hatinja sendiri:

„Toch sekarang soeda ada ini satoe gadis jang berparas begitoe tjantik dan pinter, soenggoe goblok kaloe tiada lekas diambil boeat Tjhia Kiong.”

Begitoelah Thaïj Houw telah menetepken ini pikiran, sedeng Beng Tong itoe tempo keliatan soeda beres dengen pemereksaännya dan pergi keloeär boeat sediaken obat, soeda itoe baroelah ia brangkat poelang.

Tiada antara lama, Seng Tjong jang baoe poelang dari bersidang di kraton Kim Loan Tian, poen telah dateng ka sitoe boeat tengokin sang iboe, serta berdoedoek di samping pembaringan.

„Ach, Hong Dji,” begitoelah sekoenjoeng-koenjoeng kedengeran Thaïj Houw membilang pada Seng Tjong, „soenggoe boleh dikata Hong Dji ada koerang tjerdik! Ketahoeilah bahoea Lee Koen Giok itoe, sebetoelnja ada saorang gadis jang telah menjaroë djadi lelaki, tetapi heran sekali soeda sebegitoe lama, Hong Dji tiada perna pikir dan bertjoeriga sampe di sitoe? Na, sekarang menoeroet Aij Ke poenja pikiran, ada baek sekali Koen Giok lekas-lekas disoeroë toekar pakean aseli, soepaja kemoedian boleh diangkat mendjadi Tjhia Kiong Hong Houw, sedeng Aij Ke di laen taonnja bisa dapet kesempetan aken merajaken Liok Soen Taij Sioe (shedjit 60 taon) dan Hong Dji djoega djadi dapetken pembantoe-dalem jang pinter!

„Tjoema lantaran Koen Giok ada beroman amat tjakep, Boetjin djadi kliroe menjangka jang dia ada satoe anak prempoean,” berkata Seng Tjong dengen ketawa.

„Itoelah akoe tiada bisa pertjaja,” menjangkal Thajj Houw, „terang sekali dia ada orang prempoean, begimana orang masih maoe berkeras boeat bilang Koen Giok ada satoe lelaki?”

„Dia toch soeda menika dengen Nio Siang ampoenja poetri, samentara soemistri ada idoep beroentoeng dan roekoen!” sri-baginda berkata lebi djaoe, „sebaliknya djika betoel dia ada satoe prempoean, tiada bisa disangkal lagi zonder menoenggoe sampe ini saät, siang siang telah terbit kerewelan hebat.”

„Kaloe begitoe, ja, ada Aij Ke ampoenja pengliatan jang njasar,” achirnja Thajj Houw maoe mengakoe djoega, „tapi, soenggoe tiada njana di ini doenia ada djedjaka jang mempoenjai roman demikian tjakep, lagipoen berkepandean loear biasa serta paham dalem ilmoe thabib melebiken segala Thajj-ie. Kaloe Aij Ke sampe ini saät masih bernjawa, itoelah ada pengasian dari Lee Koen Giok saorang, maka Hong Dji haroes djangan loepa boeat kemoedian kasi naek diapoenja

pangkat, agar tiada membikin ketjiwa dia-poenja soesa-paja."

Seng Tjong berdjandji aken seleksnja me-ogiringin itoe iboesoeri ampoenja kehendakan.

Begitoelah sesoeda berselang kira - kira sepoeloe hari, Thaij Houw keliatan moelai semboeh betoel dan berada poela dalem keadaän sebegimana biasa.

Samentara itoe, di satoe pagi, selagi Seng Tjong doedoek di tachta keradjaän, tiba-tiba madjoe mengadep saorang pembesar Lie Po jang merapport katanja:

„Bahoea tadi malem, Peng Po Siang Sie, Tjoe Ke Lian, telah meninggal doenia lan-taran penjakitnja, demikianlah harep Pihe mendapet taoe !”

„Ach !” sabdanja baginda sembari mengela napas, „soenggoe tiada beroentoeng moesti keilangan saorang mantri jang setia dan bi-djaksana.”

Laloe baginda keloearken titah boeat me-njediaken satoe medja hidangan kebesaran aken disembajangin pada hadepannja si mati, boeat mana diprenta pembesar Lie Po aken mewakilin boeat pergi sembajang.

Itoe pembesar menerima ini titah, tapi sebelonnja berlaloe, kombali ia merapport, oedjarnja :

„Bahoea Peng Po Siang Sie adalah mempoenjai tanggoengan dan kewadjiban boeat mengepalaï seloeroe negri ampoenja pembesar-pembesar militair dalem oeroesan bala-tentara, maka itoelah ada satoe djabatan jang terpenting, tiada sekali-kali boleh tinggal kosong; dari itoe, harep Pihe soeka selekasnya menetepken sala satoe di antara mantri - mantri dalem keradjaän jang tjakep boeat itoe lowongan, agar oeroesan tiada sampe djadi kepiran.”

Djoestroe inilah memang ada disetoedjoe betoel dengen angen-angennja, maka djoega baginda lekas bersabda :

„Ja, Tim soeda mengarti dan pikir mateng boeat ini oeroesan !”

Kemoedian baginda prenta silahkan Lee Koen Giok madjoe mengadep, pada siapa ia berkata :

„Soeda njata bahoea Keng mempoenjai kepinteran jang haroes dihargaken tinggi, Tim sekarang mengoerniaken Keng boeat itoe djabatan Peng Po Siang Sie, djoega sebagai tanda trima kasi atas Keng poenja djasa jang telah bisa menoeloeng djiwanja Thaij Houw.”

Beng Tong tjeplet berloetoet kombali se-raja menampik, oedjarnja :

SIN BOE TO DJIN



OH PIT KHAIJ

WIE JONG TAT

„Kaloe sadja Thaij Houw soeda bisa tinggal slamet, itoelah ada dari koedratnja Allah jang telah membri berkah atas Pihe ampoe-nja pri - kebaktian, Sin tiada brani akoehin itoe djasa. Apalagi dengen Sin poenja oesia terlaloe moeda, mendadakan perolehken ini satoe kedoedoekan moelia dan penting, salasala orang nanti tjoerigaïn Pihe dengen berikoet toedoehan seperti djoendjoengan jang koerang adil. Maka itoe, Sin moehoen sangat Pihe soeka tarik kombali poetoesan demikian.”

„Semoea orang kenal Keng poenja ketjakepan, antero mantri mengetahoei sampe baek Keng poenja kepinteran tjoekoep soeroepin kedoedoekan boeat satoe Tjaij Siang, apa - kata tjoema satoe djabatan Peng Po, jang rasanja masi belon tjoekoep loeas boeat lapangan Keng bisa oendjoekin seantero kepandean Lantaran ini, Tim harep Keng tiada terlaloe menampik.”

Seperti orang tiada dapet djalan boeat lolosin diri, Beng Tong kepaksa trima djoga itoe djabatan sembari oetjapken trima kasi, kemoedian lantas menoekar di sitoe djoega iapoenja pakean jang ada, dengen itoe pakean kebesaran dari kwaliteit Siang Sie (minister).

Sekalian pembesar-pembesar militair dalem keradjaän, rata-rata poen setoedjoe atas ini keangkatan, kerna semoea taoe betoel Beng Tong ada satoe mantri jang djoedjoer dan pemoerah, hingga orang boleh traoesa ber-koeatir saben-saben moesti merogo kantong boeat soeapan, kapan ada apa-apa jang perloe dapat toendjangan atawa sokongan dari marikapoenja chef.

Sesoeda ini keangkatan mendjadi beres, baginda Seng Tjong laloe menanja poela pada Koen Giok :

„Siapa Lee Keng ampoenja ajah - bonda ? Dan mendjabat pangkat apa ? Bolehlah sigra rapportken terang, kerna Tim djoega berniat hendak membri koerniaän atas marikapoenja djasa soeda membri pendidikan bagoes pada poetranja, sehingga mendjadi orang jang bergenja bagi negri.”

„Sin poenja ajali-betoel ada bernama Lee Tiauw In, iboe To Sie, semoea berasal toeroenan orang tani begitoepoen sekarang.” merapport Beng Tong, „samentara kaloe Sin bisa poenja ini sedikit kepandean dan beroleh nama, itoelah semoea ada dari pengasiannja Sin poenja ajah dan iboe - poengoet, jang boeat mana Sin tiada boleh meloepaken, serta sekarang membri rapportan

sebenernja."

„Baeklah,” bersabda sri - baginda, „Tim sekarang koerniaken Keng poenja ajah-bonda kandoeng dengen gelaran kebesaran dari golongan klas ampat, sedeng Keng poenja ajah-poengoet dikoerniaken kebesaran Tiong Hian Taij Hoe, iboe - poengoet Soen Sie, gelaran Soe Pin Kiong Djin; lebi djaoe, Keng poenja bini-kawin, Nio Sie, boleh me-make titel It Pin Hoedjin !”

Menerima ini semoea koerniaän, Beng Tong merasa amat girang, dengen sorot moeka bersri-sri kombali ia hatoerken trima kasi atas boedinja sri-baginda.

Kemoedian Seng Tjong laloe silaken Nio Siang dateng mengadep, seraja bersabda :

„Lo Sianseng djoega telah oendjoekin pa-hala boekan ketjil dengen membri voortsel dan menanggoeng penoe aken Lee Koen Giok mengobatin Thaij Houw sehingga mendjadi semboehnja, maka dengen ini Tim djoega koerniaken Keng gelaran tambahan, jaitoe Thaij Tjoe Thaij Po !”

Nio Siang dengen berlcetoet oetjapken ia-poenja trima kasi boeat itoe pengoerniaän. Kemoedian itoe persidangan laloe ditoetoep, sedeng baginda balik poelang ka dalem astana, adalah sekalian mantri poen berbareng

pada boebaran, begitoe djoega Nio Siang bersama mantoenja dengen membawa itoe semoea pakean kebesaran, sigra djoega balik poelang ka gedongnja.

Koetika So Hoa menerima ini warta, boeroe-boeroe ia prenta boedaknja aken sigra menjediaken medja sembahang boeat menjamboet itoe pakean kebesaran dari peangoernianja sri-baginda, samentara dalem hatinja traloepoet soeda berpikir katanja :

„Kendati satoe soeami jang sedjati, djoega belon tentoe aken bisa perolehken ini gelaran It Pin Hoedjin boeat akoe. Tapi sekarang akoe bisa dapetken itoe dengen perantaraän soeami palsoe, ja, ja, inilah tiada beda seperti satoe permaenan komedi, jang tjoema bagoes dipandeng zonder mempoenjai oedjoed jang bener.”

Samentara tiada lama kemoedian, di gedong Siang Hoe betoentoen-roentoen telah dateng mengoendjoengin berbagi-bagi pembesar jang mengatoerken slamet pada Nio Siang; begitoe djoega itoe sekalian pembesar cieviel dan militair jang ada di bawah kekoeasaännja Peng Po Siang Sie, rata-rata poen telah dateng hoendjoekin diri.

Beng Tong menolak dan kirim kombali sesoeatOE barang soembangan jang diatoaer

oleh itoe berbagi-bagi pembesar tjoema di-perkenanken orang boleh trima segala per-senan jang dioentoekin bagi penggawal pin-toe, tapi ini djoega ada dilarang keras boeat orang moesti lakoeken paksaan biarpoen barang sedikit, hanja haroes ditrima meno-e-roet pengasian sesoeka sendiri dari masing-masing tetamoe jang dateng berkoendjoengan.

Begitoelah orang berada dalem kerepotan ampir seharian, sedeng di esok harinja Beng Tong telah membilang pada So Hoa :

„Ajah poengoet, Khong Djia San, ada perlakoeken akoe begitoe baek serta melimpaken boedi boekan ketjil, tadinja kerna akoe masih belon mempoenjai pegangan djabatan jang tetep, mendjadi tiada begitoe sampoerna boeat oendang dia dateng tinggal di sini. Tapi sekarang setelah memangkoe ini djabatan Peng Po jang termoelia, akoe pikir ada pantes sekali mengadjak dia berserta seisi roema, pinda ka kota radja dan tempatin marika di ini gedong poenja bagian samping, jalah di Jan Ho Tong, soepaja dengen begitoe akoe dapet djalan boeat membales sedikit atas diapoenja boedi jang besar. Dan begimana kaoe pikir ?”

„Memang begitoe ada pantes sekali boeat mengoendjoek jang Siotjia tiada perna me-

loepaken orang poenja boedi kebaekan,"
djawab So Hoa.

Laloe kemoedian ini soeami - istri dateng bersama - sama ketemoeken Nio Siang dan Keng Hoedjin, seraja menoetoerken terang marikapoenja maksoed hati prihal hendak adjak pinda itoe ajah angkat bersama sekalian familienja.

„Inilah memang ada satoe kepantesan serta mendjadi kaoeorang ampoenja kewadjiban jang teroetama," saoetnja Nio Siang dengen setoeloesnja hati, „moestail amat akoe nanti melarang, maka kerdjakenlah dengen traoesa bersangsi boeat menjampeken itoe niatan."

Apabila mendapat ini perkenan, dengen boenga Beng Tong poen lantas menoelis sepoetjoek soerat, serta boengkoes rapi itoe semoea pakean dan kopiah kebesaran Tiong Hian Taij Hoe, berikoet Soen Sie ampoenja Hong Khoa. Sedeng sesoedanja segala apa diatoer beres, Beng Tong laloe panggil dateng iapoenja doe orang pengikoet jang boleh diandelin, kasiken ongkos perdjalanan setjoekoepnja dan prenta marika itoe aken lekas brangkat ka bilangan Ouw Kong, membawa itoe soerat berserta boengkoesan boeat disampeken pada Khong Djia San.

Itoe kedoea pengikoet poen dengen zon-

der berajal lagi sigra brangkat djalan, boeat melakoeken prentanja sang madjikan.

* * *

Adapoen dengen semboehnya Thaïj Houw, serta keadaän badannja bisa kombali lagi sebegimana biasa, baginda Seng Tjong lantas titah pembesar Kim Thian Kam aken mentjari serta menetepken hari baek boeat mengadaken soeatoe pesta besar, sebagai tanda mengoendjoek soekoer dengen Thaïj Houw ampoenja semboeh dari penjakit.

Begitoelah koetika soeda sampe pada hari jang ditetepken, sri - baginda siang - siang soeda titah menjediaken medja sembajang, kemoedian lantas lakoeken persembajangan dengen mengadep ka arah djoeroesan langit boeat njataken trima kasi atas koerniaännja Toehan jang telah membri keberkahan.

Sesoeda itoe, semoea Thaïj Kam dan Kiong Lie, serta seantero isinja astana rata - rata telah dibri kesempatan boeat makan-minoem dan berseneng - seneng sampe sepoeasnja. Begitoe djoega di kraton Kim Loan Tian, itoe waktoe telah diboeka medja perdjamoean besar boeat mendjamoe seantero mantri-mantri, besar dan ketjil. Ketjoeali itoe kedoea Tjaij Siang dalem keradjaän, maka

adalah Lee Koen Giok disilahkan berdoe-doek pada kedoedoekan jang terbesar dalem itoe perdjamoean.

Beng Tong menampik sanget dengan alesan jang ia masih beroemoer amat moeda serta djoega berpangkat renda, maka tiada brani trima itoe kehormatan besar dengan berlakoe lantjang. Tapi baginda beroelang-oelang memaksa djoega seraja kemoedian bersabda :

„Toch ini perdjamoean soeda diadaken lantaran Thaij Houw, jalah sebagi djalan boeat mengatoerken trima kasi atas Keng ampoenja djasa sebagi thabib jang pande. Moelai dari Tim sampe kapada sekalian mantri-mantri paling renda, kaloe sadja ini hari bisa hadepin ini keadaän jang begitoe menggirangken, jalah semoea soeda tertjipta atas Keng saorang ampoenja pahala. Dari itoe, boeat ini kedoedoekan kapala-medja soeda tentoe ada teroentoek bagi Keng dan siapa jang brani berlakoe lantjang boeat kangkangin itoe kedoedoekan, maka biarlah Keng djangan menampik poela serta kitaorang ini hari moesti minoem sampe semoeanja mendjadi mabok baroe berachir.”

Sesoeda tiada bisa menolak lagi, Beng Tong baroe maoe ambil itoe tempat doedoek

sebegimana disediaken boeat dia, kemoedian baroe dateng gilirannja semoea mantri-mantri boeat mengambil tempat doedoek masing-masing dengen menoeroet tingkatan pangkatnja.

Demikianlah antara radja dengen mantri-mantrinja keliatan moelai makan dan minoem dengen penoe pengrasaän bergeombira.

Tenga orang makan-minoem, Thajj Houw telah prenta Thajj Kam bawa keloeare satoe djoeba soeiaman jang tertaboer dengen benang-benang mas, berikoet satoe Giok-toa berkembang dan sepoeloe bidji moetiara-moetiara besar, boeat dikasi persen pada Lee Koen Giok.

Sesoedanja Beng Tong hatoerken trima kasi atas itoe pembrian, langsoeng di sitoe djoega ia ganti pake itoe djoeba soelaman, sedeng sang Giok-toa ada teriket di pinggangnja. Dengan begitoe, iapoenja roman djadi tertampak semingkin tjakep dan angker. Kemoedian ia kombali dateng berdoedoek di tempatnja boeat landjoetken makan dan minoem.

Apabila soeda berdjalan poela sedikit lama, baginda laloe memanggil dateng itoe delapan orang Thajj-ie, seraja membri tegoran katanja :

„Thaij Houw sebetoelnja ada berbadan sehat dan koeat, tapi kaoeorang sebaliknya brani berlakoe begitoe lantjang aken tjoba merintangin dipakenja obat jang mandjoer dan djitoe, kerna kaoeorang anggep itoe matjem obat ada berbahaja sebab bertentangan dengen kaoeorang ampoenja pendapatan, jang sekarang ternjata ada sanget kliroe. Tapi soekoer Lee Keng soeda pertangoeng-ken djiwa seroema tangganja boeat itoe obat, sehingga Thaij Houw sekarang bisa mendjadi semboeh betoel. Dan, begimana kaoeorang maoe bilang ?”

Sekalian Thaij - ie itoe keliatan mantoek-mantoekin kapalanja dengen berloetoet dan kemoedian mengoetjap dengen soeara tiada bersemangat :

„Menoeroet keadilan, Sin sekalian pantes menerima hoekoeman mati !”

„Tetapi,” bersabda poela baginda dengen ketawa, „kaoeorang djoega tiada boleh ter-laloe disalaken, tjoemalah ada kekoerangan pengetahoean dan pladjaran. Sekarang Tim melaenken menghoekoem kaoeorang aken masing-masing menghormatin satoe tjangkir arak pada Lee Peng Po.”

„Sin sekalian dengen keridlahan soeka mendjalanken ini hoekoeman,” berkata itoe

sekalian Thaij-ie dengen girang serta menghatoerken trima kasi. Kemoedian laloe satoe-persatoe menjoegeoken arak pada Beng Tong, masing-masing setjangkir.

Ketahoeilah pembatja, Lee Beng Tong sebetoelnja ada saorang jang pande minoem, djarang sekali ia taoe mabok arak; tapi ini hari, boleh djadi saking dalem hati merasa amat goembira, sedari tadi ia soeda minoem boekan sedikit, samentara sekarang kombali moesti berhadepan poela dengen itoe delapan Thaij - ie, jang masing - masing orang diwadjibken membri hormat padanja dengen setjangkir arak, maka tiada heran itoe tempo traeroeng ia djadi rasaken mabok anem - toedjoe bagian, tapi ia paksa djoega bertahan seberapa bisa, hingga badannja keliatan tiada bisa tinggal anteng, malah mirip poehoen Jang Lioe jang ketioepan angin. Di moekanja timboel warna mera jang meroepaken kembang roos sedeng megarnja, apalagi di badannja itoe tatkala ada memake djoeba soelaman emas jang berkredep-kredep tjahajanja; semoea itoe tjoekoep menambaken boeat parasnja tertampak semangkin manis dan elok.

Tersoeroeng oleh pengrasaan meresep, apa poela berada di bawah pengaroehnja arak,

tiba-tiba baginda Seng Tjong kedengeran berkata pada Beng Tong :

„Lee Keng, itoe hari selagi memereksa Thaij Houw poenja mek tangan, Thaij Houw soeda tjoerigaken keras bahoea Keng ada saorang prempoean jang menjaroe lelaki, tapi setelah Tim membri ketrangan Keng toch soeda beristri dengen Nio Siang am-poenja poetri, baroe Thaij Houw maoe pertjaja betoel jang Keng ada satoe lelaki toelen. Sekarang ini, memandeng Keng poenja roman sewaktoe dalem keadaän setenga mabok, soenggoe tertampak satoe kaeilokan jang loear biasa dan jang sekalipoen ditjari di antara seantero gadis-gadis, toch belon tentoe bakal bisa dapetken itoe paras jang melebiken daripada Keng. Ja, tiada heran kaloe sadja Thaij Houw sampe kliroe menjangka Keng ada satoe prempoean !”

Beng Tong sigra bangoen berdiri, berbarang telah djatoken dirinja berloetoet di hadepan sri-baginda, seraja berkata dengen aer-moeka soenggoe - soenggoe :

(Aken disamboeng).